



古  
微  
書

欽定四庫全書提要

古微書三十六卷明孫穀編穀字子雙華容人考劉向七略不著緯書然民間私相傳習則自秦以來有之非惟盧生所上見史記秦本紀卽呂不韋十二月紀稱某令失則某災至伏生洪範五行傳稱某事失則某徵見皆讖緯之說也漢書儒林傳稱孟喜得易家候陰陽災變書尤其明證荀爽謂起自哀平據其盛行之日言之耳隋志著錄八十一篇燔燒之後湮滅者多至今僅有傳本者朱彝尊經義考稱易乾鑿度乾坤鑿度禮含文嘉猶存顧炎武日知錄又稱見孝經援神契然含文嘉乃宋張師禹所撰非其舊文援神契則自宋以來不著

於錄殆炎武一時筆誤實無此書則傳於世者僅乾鑿度乾坤鑿度二書耳

皇上光崇文治四庫宏開二酉祕藏罔弗津逮又於永樂大典之中搜得易緯稽覽圖通卦驗坤靈圖是類謀辨終備乾元序制記六書爲數百年通儒所未見其餘則仍不可稽蓋遺編殘圖十不存其一矣穀嘗雜採舊文分爲四部總謂之微書一曰焚微輯秦以前逸書一曰緯微輯漢晉間箋疏一曰闕微徵皇古七十二代之文一曰刪微卽此書今三書皆不傳惟此編在遂獨被微書之名實其中之一種也所採凡尙書十一種春秋十六種易八種禮三種樂三種詩三種論語四種孝經九種



河圖十種洛書五種以今所得完本校之數不過粗存梗概又唐瞿曇悉達開元占經去隋未遠所引諸緯如河圖聖洽符孝經雌雄圖之類多者百餘條少者數十條數亦未睹其書故多所遺漏又摘伏勝尚書大傳中洪範五行傳一篇指爲神禹所作尤屬杜撰然其採摭編綴使學者生於千百年後猶見東京以上之遺文以資考證其功亦不可沒經義考索緯一門所引據出數書者十之八九則用力亦可謂勤矣緯與經名雖相輔實各自爲書卦氣之說孟喜始據以詁易何休鄭元援引尤多宋歐陽修乞校正五經劄子欲於註疏中全削其文而說不果用魏了翁作九經正義始盡削除此實

說經家謹嚴之旨與孫復說春秋而廢傳鄭樵說詩而廢序深文巧詆務排漢學者不同然義理則當尊正軌考證則不廢旁稽如鄭元註禮五天帝具有姓名此與道家符籙何異宋儒闢之是也至於蔡沈書集傳所稱周天三百六十五度四分度之一實洛書甄耀度尙書考靈耀之文黑道二去黃道北赤道二去黃道南白道二去黃道西青道二去黃道東實河圖帝覽嬉之文朱子註楚詞崑崙者地之中也地下有八柱互相牽制名山大川孔穴相通實河圖括地象之文三足烏陽精也貫春秋元命包之文

案此四條皆朱彝尊經義考之說

以至七日來復

自王弼以來承用六日七分之說朱子作易本義亦弗

能易實易稽覽圖之文洛書四十五點邵子以來傳爲  
祕鑰其法出於太乙九宮實易乾鑿度之文是宋儒亦  
未能盡廢之然則穀輯此編於經義亦不無所裨未可  
盡斥爲好異故今仍附著五經總義之末焉



古微書自序

昔聞之仲尼愛義子長愛奇子小子亦竊有愛焉曰愛其古  
世之人得一醯一𩚑流傳三古間則必什襲之而寶之而矜  
之曰我得古矣古人之輿帙逸文豈直一醯一𩚑耶夫以聲  
響俱邈誦覽所略舉世之不必經見者而我得見之其可愛  
孰甚矣又況乎燕天香奏雲璈羅上古之天球赤刀而環列  
丈室中又豈直一醯一𩚑之細耶荀子曰夫學貧而富鄉也  
窶然貧之夫也俄而治天下之大器舉在此非窮古力哉是  
以古人之學恒富今人之學恒貧古人之學恒富然而非富  
于書也今人之學恒貧然而非貧于書也漢雖秦餘哉書皆  
道古故其學最富至唐若宋而人人著籍矣人人著籍則人

人競傳人人競傳古安得復存今日者著錄之繁篇帙之廣  
詎不什百倍于漢然而試探其業力與其所就今之不若宋  
猶宋之不若唐者何哉寢侈于近日之書而寢減于古何怪  
乎書愈富學愈貧也余不佞家世藏書稍有異本輒从義韻  
以降斷乎陳隋取其凡蒂于古綴于古駢枝于古響象依悠  
于古者聚而成書伯之以刪曰以旌讖緯之伏遁仲之以焚  
曰以攬灝噩之什一叔之以綬曰以索箋疏之象罔季之以  
闕曰以甄元古之紀歷爲卷不多證學差遠庶古人之奧帙  
逸文將湮不湮而亦使海內窮古之儒不至貧于學之無從  
遡者其賴是乎或曰古則傳矣古而旣傳安用是書也使古  
而不傳者子又安得其所傳而傳于世曰是不然予所愛傳

而未嘗傳傳于古人之篇表不盡傳于今人之誦覽者也集  
古者梯崖扣冢形命可遺彼性也好之而力之富又足以聚  
之然自予視之猶以林回之樹子當千璧焉何也謂非其神  
也文也者古人之神而傳焉故可寶也苟古之所傳帖則腕  
矣畫則日矣之二物夫寧非神雖然義弗主焉文以神祕神  
以義尊夫文而無其義亦不足以規億載矣余貧夫也擴余  
目于穹壤間曾不數里署諸古博氏之林無秒分焉謂耳目  
之褊也而多未逮則信有矣若夫子以爲寶愛而人將瓦礫  
視之曰是直斷缺無用之文鬼瑣不經之學抑何敢強焉

南郡賁居子孫 穀雙甫氏識





序

嗜古而不得其精此說鈴書肆所興誚也其精焉者借古人  
之已事已言卽以自行其學力竊怪呂覽鴻烈韓詩說苑全  
襲往語交仍沓蹈而亦復謂之著書何哉彼其志亦各有不  
可於一世而微文寓焉矣大都春秋而下無立言者是以非  
古則無徵非聖則不尊著書之林其別有四焉有祖古人而  
附其翼者傳註家是也太元元經傳而變者也有臚古事而  
競其豔者類誌家是也玉海學海通志略類而枝者也有窺  
古之奧而獵其僻者夷堅家是也真源真誥夷而閎者也有  
羅古之疑而覈其戾者辨博家是也論衡史通辨而淵者也  
國朝多聞亦復數家然丹鉛之所證宛委起而非之天中之

所侈歸雲出而狹之以至筆叢筆乘遞互剝擊後之人欲掩  
乎前之人以明其高後之書實踵乎前之書以成其博當其  
屬詞比事采拾奇隱挾爲家珍各有一矜祕自喜之志氣而  
不欲令人測其所從來此通習也藉有人于斯盡繙其所拾  
之家珍而宣流海內則向者皆失其奇隱矣故有謂祕書不  
宜刻者犯造物之忌非造物忌焉乃從昔學人之所忌也苟  
忌於昔而不忌於今其有功後學不更偉哉余嘗與友人言  
上古書絕矣周秦之際兩漢鴻儒豈無遺文琬琰彝鼎適見  
適伏者每於經疏史志諸類說部頗見有散逸書目或存其  
三數句或值其一二簡而未有全牘覩其通行余用是疑此  
卽向者學人所矜慎而不出者矣及遇楚生孫子雙乃能爲

子暢而言之曰此其書故在生得而緝之成古微書約有四部周季爲刪秦先爲焚兩漢爲綫上古爲闕生平自制義以外屏去外慕肆力經史皆嘗爲之櫛字以成句續句以成章衍章以成卷聯卷以成集矣余聞之穆然思愀然嘆曰嗟乎孫子天下之窮覽志士矣哉其述刪也近乎傳其述焚也近乎類其述綫也近乎辨其述闕也近乎夷雖未嘗哀然立言乎固已千古自命矣蓋孫子抱其學有不可於一世之意世亦少有能知用者也漢儒有言扛鴻鼎揭華旗壯夫之力耳儒生之力疏通知遠乃能百萬人何則學之爲力重也今夫浮綺之詞炫然譁衆世豈乏人顧亦萎然而易盡夫其味淡聲希不噪於時而真能與昔賢博達抗其敵者則寥寥無幾

士焉故稱平學之力也意中所驚憚所榮慕之古人以爲殊  
尤絕類者今日所視眇眇韋素耳當吾世失奇士吾何忍焉  
子雙爲楚名家子祖父四世積有詩賦客秋遇金陵曾見其  
文章卓爾不羣因延致樞署中日夕忝討坐臥一室未嘗出  
門戶相對逾冬春馮馮如也然其一啟頰一舉指無非書者  
自書以外輒不多及其可以今人相視哉且夫天地之大奇  
珍上瑞散流錯現亦何日不有世眼如豆目所未見輒咋舌  
縮筆相顧而謂之亡是謂之烏有詎不陋與今而後知古之  
書未嘗不在古之人亦未嘗不可見也觀是書者其小之而  
無之則布帛菽粟非聖不誦自託爲醇儒其大之而有之則  
牛鬼蛇神無書不讀不失爲通儒醇與通任其所自取焉此

則予不佞爲行是書之意也

河間范景文題



古微書略例

一曰刪微

地南北爲經東西爲緯今也經存而緯亡是有南北無東西也聖人之言理數具舉旣師其理安遺其數可付之刪後之文無足取也哉茲所遇圖緯諸家雖細錄也雖僞收也雖斷章者亦取焉首刪微

一曰焚微

書以焚亡亦以焚重非焚之重焚而有不焚故焚重也漢桓  
鋼黨愈烈齊武滅僧僧愈繁時勢固然然則上古至文星  
星燦燦雖經秦之災而寒烟落地中猶可拾取焉是亦鳳之  
一毛而虬之一甲也次焚微

一曰綫微

象緯者天之轉注也海岳者地之轉注也畿輔之內數百里所談所習莫非君舉莫非朝事蓋其近也春秋而降末光未絕焰殆無盛于漢儒倍漢而欲談經吾烏識其所本矣所得漢晉閒疏箋輒復登之以爲經翼次綫微

一曰闕微

書刪矣焚矣孔子而前遂無帝系帝系而上遂無七十二代之皇哉春秋夏五或不月月或不事闕之也闕之而又書之者以待備也聖人闕之以待備吾輩安得不備之以待闕三代以降而有能力遡混茫者雖齒之邃古之篇亦何讓焉次闕微



一是集皆遠古漆書竹簡之遺非唐宋縹緗所盛傳者卽  
歷史經籍藝文諸志及內府天下書目亦僅存其名而亡  
其書雖藏書家疑未必有也茲所錄著每一書各指一事  
其牘長者孤行爲卷短狹者萍合之烏集之彙以成卷正  
不足文字觀耳

一是集多得之十三經注疏及廿一史書志及太平御覽  
玉海通典通考通志略諸大部所援引中或載數段或數  
行或數句前所見者俟後續之後所得者徵前冠之中有  
異同者詰前後絡之皆眞瑤珞非贗琬琰蒐羅輯綴累月  
窮年故其首尾都無倫次正不必苛其端緒摘其挂漏也  
一邇年坊肆翻刻古書汗牛充棟如古今逸史漢魏叢書

古書十九種祕冊彙函每一部中各百十家皆是流行篇  
卷故於此集絕不雷同至如百川學海百家名書古今說  
海歷代小史稗海小說等又皆唐宋以後耳目近事亦此  
中所不贅也

一是集文多聲軋理或與實故每卷之首輒有小引爲之  
論次其卷中篇目間有難曉者竊以數語疏釋之至本文  
有古注者錄其原注無原注者復拾異說與之旁通使讀  
之者開卷而豁然則又賁居子苦心之餘事也

敘刪微

緯有七儷經而行顧其文皆刪餘也相傳孔子既述六經知後世不能稽同其意別立緯及讖八十一首以遺來世故東漢謂之古學魏晉以降倚爲符圖圖令人諱諱令人憚至隋而燬遂禁不傳噫傷哉使孔門知百世之學而今無聞也病之者以爲多談怪迂義致無取夫經之尊譬帝王也圖緯雖纖陋譬之猶騶賁奄奚而曰環侍帝也今欲親識帝之面而曰必屏而騶賁卻而奄奚則帝難見矣欲見孔子而不欲見其親授受者之謦欬之光容孔子可見乎然則惟孔宜刪非孔烏得刪且非孔而欲識孔又烏得刪也自昔爲之說者有郤有袁爲之注者有鄭有宋一以爲起于中興之前終張之

徒皆借仲尼雜以已說一以爲盛于建武之代俗儒趨時篇  
卷第目轉加增廣惟劉彥和以爲事幽詞富有助文章故義  
皦之源鍾律之要瑞孳之符神鬼之狀讀之者皆有取焉嘗  
讀歷代史經籍藝文空標其目而書竟隱泯矣間有存者亦  
復如裂錦碎璧聲味不聯予苦心於茲且十年顧簡不一遭  
遭不連行於是考其班部擢其宗旨覈其訛闕聚其落離蓋  
句纍而章章纍而篇篇纍而帙焉雖非其本卷本文之後先  
要亦可以大義徵以文律準也

刪微目次

說緯

緯之興其興于符命乎五德承運遞有感生故首尙書焉  
符命之替也災異滋多獲麟而經亦孔子之龍與馬也故  
次春秋有災有異天人之道治易數幽元乃可證嚮也易  
緯至博而傳尙存故又次之禮行變化樂動神示皆倚易  
而滋矣又次之久矣夫樂之不作也蓋後詩而亡也故詩  
次樂焉正樂刪詩復爲誰孔子也孔子邁九聖而無其遇  
迄爲素王諸賢悼惜故論語緯又次之語莫大乎孝孝至  
通天北落爲降紫麟聿來而孔子之元命亦可知矣孝經  
緯又次之嗟嗟此以悲河不圖也惟河與洛天諄諄命羣

聖以闢諸經以祖焉是不可以無述終之以河洛緯  
尚書緯

卷一

尚書考靈曜

卷二

尚書考靈曜

卷三

尚書帝命驗

卷四

尚書五行傳

尚書璇璣鈴

尚書刑德放

尚書運期授

尚書帝驗期

卷五

尚書中候

中候握河紀

中候考河命

中候摘洛戒

中候雜篇

春秋緯

卷六

春秋元命包

卷七

春秋元命包

卷八

春秋演孔圖

春秋合誠圖

卷九

春秋文耀鉤

春秋運斗樞

卷十

春秋感精符

春秋考異郵

卷十一

春秋潛潭巴

春秋說題辭

卷十二

春秋漢含孳

春秋佐助期

春秋保乾圖

春秋握誠圖

春秋內事



卷十三

春秋命歷序

易緯

卷十四

易通卦驗

卷十五

易通卦驗

易坤靈圖

易稽覽圖

卷十六

易河圖數

易筮類謀

易九厄識

附易雜緯

禮緯

卷十七

禮含文嘉

卷十八

禮稽命徵

卷十九

禮斗威儀

樂緯

卷二十

樂叶圖徵

卷二十一

樂動聲儀

卷二十二

樂稽耀嘉

詩緯

卷二十三

詩含神霧

卷二十四

詩推度災

詩汎歷樞

論語緯

卷二十五

論語比考識

論語議考識

卷二十六

論語摘輔象

論語摘衰聖

論語陰禧識

孝經緯

卷二十七

孝經援神契

卷二十八

孝經援神契

卷二十九

孝經援神契

卷三十

孝經鉤命決

孝經中契

孝經左契

孝經右契

孝經威嬉拒

卷三十一

孝經內事圖

河圖緯

卷三十二

河圖括地象

河圖始開圖

河圖絳象

卷三十三

河圖稽耀鉤

河圖帝覽嬉

河圖挺佐輔

河圖握矩紀

附河圖雜緯篇

卷三十四

河圖玉版

龍魚河圖

洛書緯

卷三十五

洛書靈准聽

卷三十六

洛書甄曜度

洛書摘六辟

洛書錄運法

附河洛讖

古微書卷一

守山閣叢書經部

明孫穀編

尚書緯

賁居子謹按隋史

經籍志尚書緯三卷真晉書五十四卷

璣鈴曰考靈曜曰

刑德放曰帝命驗曰運期授皆主書

天咫地游帝王運歷之大事而五逸其三矣稍可窺者

考靈曜帝命驗二文亦復無篇第無章次姑循其義類

而權爲班部至其叢沓錯零不可爲顛委者雖一語雖

三數語猶復綴之以志探賾之勤其中候諸讖別自爲

篇

尚書考靈曜

賁居子曰學莫大於稽天自堯歷象舜璣衡於是禮樂  
兵刑一祖以天矣後世以宣夜爲殷制周髀託於周公  
然於天度多不相應惟渾儀之圖師隹璿璣歷代實用  
自漢張衡鑄爲銅儀迄唐之梁令瓚李淳風以至許衡  
郭守敬莫能外焉而不知其祕皆原於緯書漢儒窮緯  
故談天爲至精此考靈曜所繇名也孔門之學揆合唐  
虞以故其傳天官亦最密云謂緯書不出於孔門者漢  
儒亦何自而遡其術哉此亦可爲闢緯者決疑

天從上臨下八萬里天以圓覆地以方載

○周禮大司徒疏  
又考丁記匠人疏

向臨作

鄭康成注曰天者純陽清明無形聖人則之制璿璣玉衡



# 以度其象

張衡靈憲曰天有九位自地至天一億一萬六千二百五十里懸天之晷薄地之儀皆千里而差一寸

楊泉物理論曰所以立天地者水也成天地者氣也水土之氣升而爲天天者君也夫地有形而天無體譬如火焉烟在上灰在下也又儒家立渾天以追天形猶車輪焉周髀立蓋天言天氣循邊而行猶磨石焉斗極天之中也言天者必擬之人故自臍以上人之陽也自臍以下人之陰也自極以南天之陽也自極以北天之陰也

天如彈丸圍圓三百六十五度四分度之一

○語見禮月令疏

一度二千九百三十二里千四百六十一分里之三百四十

八

○禮月令疏  
爾雅釋天疏

按孔穎達疏云周天百七萬一千里者是天圓周之里數也。以圍三徑一言之，則直徑三十五萬七千里。此爲二十八宿周回直徑之數也。然二十八宿之外，上下東西各有萬五千里，是爲四遊之極。謂之四表，據四表之內，并星宿內總有三十八萬七千里。然則天之中央上下正半之處，則一十九萬三千五百里。地在於中，是地去天之數也。天文錄曰：天圓廣南北二億三萬三千五百里，七十五步。東西短減四步，周六億十萬七百里，二十五步。從地至天一億一萬六千七百八十六里半。下地至厚與天高等。

漢書律歷志云：二十八宿之度角一十二度，亢九氏十五

房五心五尾十八箕十一東方七十五度斗二十六牛八  
女十二虛十危十七營室十六壁九北方九十八度奎十  
六婁十二胃十四昂十一畢十六觜二參九西方八十度  
井三十三鬼四柳十五星七張十八翼十八軫十七南方  
一百一十二度丑爲星紀初斗十二度終於婺女七度子  
爲元枵初婺女八度終於危十五度亥爲娵訾初危十六  
度終於奎四度戌爲降婁初奎五度終於胃六度酉爲大  
梁初胃七度終於畢十一度申爲實沈初畢十二度終於  
井十五度未爲鶉首初井十六度終於柳八度午爲鶉火  
初柳九度終於張十七度巳爲鶉尾初張十八度終於軫  
十一度辰爲壽星初軫十二度終於氏四度卯爲大火初

氏五度終於尾九度寅爲析木初尾十度終於斗十一度二十八宿之外各有萬五千里是爲四遊之極謂之四表

○語

見禮月令疏

按天鏡經天有四表三道四表者房星也三道者房閒三道南閒爲上道中央爲中道北閒爲下道也

春則星辰西遊夏則星辰北遊秋則星辰東遊冬則星辰南遊

○禮月令疏

地有四遊冬至地上北而西三萬里夏至地下南而東復三萬里春秋二分其中矣地恒動不止而人不知譬如人在大舟中閉牖而坐舟行而人不覺也

○御覽三十六

七戎六蠻九夷

八狄據形總而言之謂之四海言皆近海海之言晦昏無所

睹也

○博物志一

鄭注云天旁行四表之中冬南夏北春西秋東皆薄四表而止地亦升降於天之中冬至而下夏至而上二至上下蓋極地厚也地與星辰俱有四遊升降四遊者自立春地與星辰西遊春分西遊之極地雖西極升降正中從此漸漸而東至春季復正自立夏之後北遊夏至北遊之極地則升降極下至夏季復正立秋之後東遊秋分東遊之極地則升降正中至秋季復正立冬之後南遊冬至南遊之極地則升降極上至冬季復正地蓋厚三萬里春分之時地正當中自此地漸漸而下至夏至之時地下遊萬五千里地之上畔與天中平夏至之後地漸漸向上至秋分

地正當天之中央自此地漸漸而上至冬至上遊萬五千里地之下畔與天中平自冬至後地漸漸而下

孔疏云此是地之升降於三萬里之中也但渾天之體雖繞於地地則中央正平天則北高南下北極高於地三十六度南極下於地三十六度然則北極之下三十六度常見不沒南極之上三十六度常沒不見南極去北極一百二十一度餘若逐曲計之則一百八十一度餘若以南北中半言之謂之赤道去南極九十一度餘去北極亦九十一度餘此是春秋分之日道也赤道之北二十四度爲夏至之日道去北極六十七度也赤道之南二十四度爲冬至之日道去南極亦六十七度 但日與星辰四遊相反

春分日在婁則婁星極西日體在婁星之東去婁三萬里以度言之十二度也則日沒之時去昏中之星近較十度旦時日極於東去旦中之星遠較十度若秋分日在角則角星極東日體在角星之西去角三萬里則日沒之時去昏中之星遠較十度旦時日極於西去旦中之星近較十度此皆於歷乖違數不合也

日道出於列宿之外萬有餘里

○周禮馮相氏疏

正月假上八萬

里假下一十萬四千里

○禮月令疏爾雅釋天疏

鄭注夏日道上與四表平下去東井十二度爲三萬里又云夏至之時日上極與天表平冬至之時日下至於地八萬里上至於天十一萬三千五百里也

孔疏云所以有假上假下者鄭意以天去地十九萬三千五百里正月雨水之時日在上假於天八萬里下至地一十一萬三千五百里夏至之時日上極與天表平也後日漸向下則是夏至之日上極萬五千里星辰下極萬五千里故夏至之日下至東井三萬里也計夏至之日日在井星正當嵩高之上以其南遊之極故在嵩高之南萬五千里所以夏至有尺五寸之景也於時日又上極星辰下極故日下去東井三萬里也

日有九光光照四極日光隆照四十萬六千里

○書鈔百四十九御覽三

地書說曰日照四十五萬里也

周髀曰日光外照徑八十一萬里周二百四十三萬里



淮南子曰日出於暘谷浴于咸池拂于扶桑是謂晨明登

于扶桑爰始將行是謂朏

鹿明也

至于曲阿是謂旦明

至于曾泉是謂蚤食至于桑野是謂晏食至于衡陽是謂

隅中至于昆吾是謂正中至于鳥次是謂小還至于悲谷

是謂鋪時至于女紀是謂大還至于淵隅是謂高春至于

連爛石是謂下春至于悲泉爰止其女爰息其馬是謂縣

車至于虞淵是謂黃昏至于蒙谷是謂定昏日入于虞淵

之汜凡曙于蒙谷之浦行九州七舍有五億萬七千三百

九里

自暘谷至虞淵凡十六所爲九州七舍也

日萬里不失九道謀

○禮月令疏里作世

鄭注黃道一青道二出黃道東赤道二出黃道南白道二

出黃道西黑道二出黃道北

廣雅云立春春分東從青道二出黃道東交於房二度中立夏夏至南從赤道二出黃道南交於七星四度中立秋分西從白道二出黃道西交於胃十二度中立冬冬至北從黑道二出黃道北交於虛二度中四季之月還從黃道又日月五星行黃道始營室東壁奎婁胃之陽入昴畢間行觜觿參之陰度東井輿鬼行柳七里張翼軫之陰入角間貫氏房出心尾箕之陰入斗牽牛間行須女虛危之陽復至營室

凡九百四十分爲一日二十九日與四百九十九分爲一月

日月東行而日行遲月行疾何君舒臣勞也日日行一度月

日行十三度十九分度之七

○白虎通日月篇以爲刑德放文

按隋志日行自秋分以後至春分其勢速計一百八十二

日而行一百八十度自春分以後至秋分日行遲計一百

八十二日而行一百七十六度每氣之下卽其李也月行

月道二十七日有餘一周天月道交絡黃道每行黃道內

十三日有奇而出又行黃道外十三日有奇而入終而復

始又歷象之說則月一日至於四日行最疾日行十四度

餘自五日至八日行次疾日行十三度餘自九日至十九

日行則遲日行十二度餘自二十日至二十三日又小疾

日行十三度餘自二十四日至於晦行又最疾日行十四

度餘此是月行之大率也二十七日月行一周天至二十九日強半月及於日與日相會乃爲一月

周髀曰日月俱起建星月度疾日度遲日月相逐於二十九日三十日間而日行天二十九度餘未有定分於是三百六十五日南極影長明日反短以歲終日影反長故知之三百六十五日者三三百六十六日者一故知一歲三百六十五日四分日之一歲終也

孔疏云凡二十八宿及諸星皆循天左行一日一夜一周天一周天之外更行一度計一年三百六十五周天四分度之一日月五星則右行日一日一度月一日一十三度十九分度之七是一月二十九日之外至第三十日分至

四百九十九分月及於日計九百四十分則四百七十爲半今四百九十九分是過半二十九分也

分周天爲三十六頭頭有十度九十六分度之十四長日分於寅行二十四頭入於戌行十二頭短日分於辰行十二頭入於申行二十四頭此之謂也

○周髀算經注

按周髀冬至晝極短日出辰而入申陽照三不覆九照三者南三辰巳午未也東西相當正南方夏至晝極長日出寅而入戌陽照九不覆三不覆三者北方三辰亥子丑冬至日出入之三辰屬晝晝夜互見是出入三辰分爲晝夜各半明矣

仲春仲秋日出於卯入於酉仲夏日出於寅入於戌仲冬日

出於辰入於申

○御覽三

按晉志曰最南去極最遠故景最長黃道斗二十一度出辰入申故日亦出辰入申日晝行地上百四十六度強故日短夜行地下二百一十九度少弱故夜長自南至之後日去極稍近故景稍短日晝行地上度稍多故日稍長夜行地下度稍少故夜稍短日所在度稍北故日稍北以至於夏至日在井二十五度去極六十七度少強是日最北去極最近景最短黃道井二十五度出寅入戌故日亦出寅入戌日晝行地上二百一十九度少弱故日長夜行地下百四十六度強故夜短自夏至之後日出極稍遠故景稍長日晝行地上度稍少故日稍短夜行地下度稍多故

夜稍長日所在度稍南故日出入稍南以至於南至而復初焉斗二十一井二十五南北相應四十八度春分日在奎十四少強秋分日在角五少弱此黃赤二道之交中也去極俱九十一度少強南北處斗二十一井二十五之中故景居二至長短之中奎十四角五出卯入酉故日亦出卯入酉日晝行地上夜行地下俱百八十二度半強故日見之漏五十刻不見之漏五十刻謂之晝夜同夫天之晝夜以日出沒爲分人之晝夜以昏明爲限日未出二刻半而明日入二刻半而昏故損夜五刻以益晝是以春秋分漏晝五十五刻諸家歷法參差不齊

日永景尺五寸日短一十三尺

一作景尺三十寸

日正南千里而減一

寸○周髀

算經注

按周髀夏至南萬六千里冬至南十三萬五千里日中立竿測影此二者天道之數周髀長八尺夏至之日晷一尺六寸髀者股也正晷者勾也正南千里勾一尺五寸正北千里勾一尺七寸日益表南晷日益長候勾六尺卽取竹空徑一寸長八尺捕影而視之空正掩日而日應空之孔繇此觀之率八十寸而得徑一寸故以勾爲首以髀爲股從髀至日下六萬里而髀無影從此以上至日則八萬里若求邪至日者以日下爲勾日高爲股勾股各自乘并而開方除之得邪至日從髀所旁至日所十萬里以率率之八十里得徑一里十萬里得徑千二百五十里故曰日晷



徑千二百五十里

隋志祖暅推地中其法曰先驗昏旦定刻漏分辰次乃立儀表於準平之地名曰南表漏刻上水居日之中更立一表於影末名曰中表夜依中表以望北極樞而立北表令參相直三表皆以懸準定乃觀三表直者其立表之地卽當子午之正三表曲者地偏僻每觀中表以知所偏中表在西則立表處在地中之西當更向東求地中若中表在東則立表處在地中之東也當更向西求地中取三表直者爲地中之正 又云宋元嘉十九年使使往交州測影夏至之日影出表南三寸二分何承天遙取陽城云夏至一尺五寸計陽城去交州路當萬里而影實差一尺八寸

二分是六百里而差一寸也後魏信都芳稱梁天監之七年見洛陽測影又見公孫崇集諸朝士共觀祕書影同是夏至日其中影皆長一尺五寸八分以此推之金陵去洛陽北略當千里而影差四寸則二百五十里而影差一寸也

唐志僧一行作大衍歷其議曰周禮大司徒以土圭之法測土深日至之景尺有五寸謂之地中鄭氏以爲日景於地千里而差一寸尺有五寸者南戴日下萬五千里地與星辰四游升降於三萬里內是以半之得地中今潁川陽城是也開元十二年測交州夏至在表南三寸三分與元嘉所測略同使者大相元太言交州望極纔高二十餘度

八月海中望老人星下列星粲然明大者甚衆古所未識  
迺渾天家以爲常沒地中者也大率去南極二十度已上  
之星則見又鐵勒回紇在薛延陀之北去京師六千九百  
里其北又有骨利幹居瀚海之北北距大海晝長而夜短  
旣夜天如暝不暝夕晒羊脾纔熟而曙蓋近日出沒之所  
太史監南宮說擇河南平地設水準繩墨植表而以引度  
之自滑臺始白馬夏至之晷尺五寸七分又南百九十八  
里百七十九步得浚儀岳臺晷尺五寸三分又南百六十  
七里二百八十一步得扶溝晷尺四寸四分又南百六十  
里百一十步至上蔡武津晷尺三寸六分半大率五百二  
十六里二百七十步晷差二寸餘而舊說王畿千里影差

一寸妄矣其北極去地雖秒分微有盈縮難以目較大率三百五十一里八十步而極差一度極之遠近異則黃道軌景固隨而變矣若令距陽城而北至鐵勒之地亦差十七度四分與林邑正等則五月日在天頂南二十七度四分極高五十二度周圍百四度常見不隱北至晷四尺一寸三分南至晷二丈九尺二寸六分定春秋分晷五尺八寸七分其沒地纔十五度餘夕沒亥西晨出丑東較其里數已在回紇之北又南距洛陽九千八百一十五里則極長之晷其夕常明然則骨利幹猶在其南矣又測日晷距陽城五千里已在戴日之南則一度之廣皆三分減二南北極相去八萬里其徑五萬里宇宙之廣豈若是乎十三

年南至岱宗禮畢自上傳呼萬歲聲聞於下時山下夜漏未盡自日觀東望日已漸高據歷法晨初迨日出差二刻半然則山上所差凡三刻餘其冬至夜刻同立春之後春分夜刻同立夏之後自岳趾升泰壇僅二十里而晝夜之差一節設使因二十里之崇以立勾股術固不知其所以然況八尺之表乎今更爲覆矩圖南自丹穴北暨幽都每極移一度輒累其差可以稽日食之多少定晝夜之長短而天下之晷皆協其數矣

古微書卷一終



古微書卷二

尙書考靈曜

天有九野九千九百九十九隅去地五億萬里一野千一百一十一隅

何謂九野中央鈞天其星角亢一作角亢氏東方皞天呂氏曰蒼天廣雅曰

上其星房心亦作房心尾東北變天陽氣始作萬物萌芽故曰變其星斗箕一作箕斗

牽牛北方元天其星須女一作須女虛危營室西北幽天其星奎婁一作奎婁

東壁西方成天呂氏曰顯天淮南曰旻天其星胃昂一作胃昂畢西南朱天其

星參狼一作觜觿參東井南方赤天呂氏淮南廣雅曰炎天其星輿鬼柳一作輿鬼

星柳七東南陽天其星張翼軫純乾用事故曰陽○御覽一

按素問引太始天元冊文丹天之氣經於危室柳鬼素天之氣經於心尾已分蒼天之氣經於危室柳鬼素天之氣

經于亢氏昂畢元天之氣經于張翼婁胃所謂戊巳分者  
奎壁角軫則天地之門戶也又曰丹天之氣經於奎壁牛  
女四宿之上下臨戊癸之位立爲火運黃天之氣經於心  
尾角軫四宿之上下臨甲己之位立爲土運素天之氣經  
於亢氏昂畢四宿之上下臨乙庚之位立爲金運元天之  
氣經於張翼婁胃四宿之上下臨丙辛之位立爲水運蒼  
天之氣經於危室柳鬼四宿之上下臨丁壬之位立爲木  
運戊爲天門乾之位也已爲地戶巽之位也自房至畢十  
四宿爲陽主晝自昴至心十四宿爲陰主夜通一日也

淮南天文訓子午卯酉爲二繩丑寅辰巳未申戌亥爲四  
鉤東北爲報德之維西南爲背陽之維東南爲常羊之維



西北爲號通之維

分寸之晷代天氣生以制方員方員以成參以規矩昏明主

時乃命中星觀玉儀之游

注以玉爲渾儀故曰玉儀

玉儀之制昏明主時

謂晷夜漏刻也○晉書天文志  
古鈔百三十初學記一御覽二

按晉志張衡制渾象具內外規南北極黃赤道列二十四  
氣二十八宿中外星官及日月五緯平子旣作銅渾天儀  
於密室中以漏水轉之令伺之者閉戶而唱之其伺之者  
以告靈臺之觀天者曰璇璣所加某星始見某星已中某  
星今沒皆如合符也

隋志王蕃云渾天儀者羲和之舊器積代相傳謂之璣衡  
其爲用也以察三光以分宿度者也又有渾天象者以著

天體以布星辰而渾象之法地當在天中丁勢不便故反觀丁形地爲外匡於已解者無異在內詭狀殊體而合於理可謂奇巧攷古渾象以二分爲一度周天七尺三寸半張衡更以銅製以四分爲一度周天一丈四尺六寸一分蕃今所作以三分爲一度周一丈九寸五分四分之三黃赤道各廣四分半相去七寸二分又云黃赤二道相共交錯其間相去二十四度以兩儀準之二道俱三百六十五度有奇又赤道見者常一百八十二度半強又南北考之天見者亦一百八十二度半強是以知天之體圓如彈丸南北極相去一百八十二度半強也

在璇璣玉衡以齊七政璿璣未中而星中是急

隋志引作璿璣中而星

未中急則日過其度月不及其宿璿璣中而星未中是舒隋

志引作璿璣未中而星中爲舒舒則日不及其度夜月過其宿璿璣中而星

中是周隋志是周作爲調周則風雨時草木蕃盛而百穀熟萬事康

也隋志盛作燕百作五孰作登周髀算經注

按羅苹路史注堯歷象立其數舜璣衡立其器璿生於淵

月魄終焉陰精之純也玉生於山虹氣藏焉陽精之純也

璣運於上以璿爲之衡望乎下以玉爲之取則乎陰陽之

運也堯正經屋舜齊緯屋所以相濟器出於人故占之以

齊七政於上數出於天故推之以授人時於下

唐志貞觀初李淳風上言漢落下閎作渾儀其後賈逵張

衡等亦各有之而推驗七曜並循赤道按冬至極南夏至

極北而赤道常定於中無南北之異蓋渾儀無黃道久矣  
太宗異其說因詔爲之至七年儀成表裏三重下據準基  
狀如十字末樹鼇足以張四表一曰六合儀二曰三辰儀  
三曰四游儀開元九年詔僧一行與梁令瓚等更鑄渾天  
銅儀圓天之象具列宿赤道及周天度數注水激輪令其  
自轉一晝夜而天運周外絡二輪綴以日月令得運行每  
天西旋一周日東行一度月行十三度十九分度之七二  
十九轉有餘而日月會三百六十五轉而日周天以木櫃  
爲地平令儀半在地下晦明朔望遲速有準立木人二於  
地平上其一前置鼓以候刻至一刻則自擊之其一前置  
鍾以候辰亦自撞之皆于櫃中各施輪軸鉤鍵關鎖交錯

相持其黃道游儀以古尺四分爲度旋樞雙環表裏畫周天度其一面加之銀釘使東西運轉玉衡望筭孔徑六分衡旋於軸中用窺列宿陽經雙環置於子午左右用八柱亦畫周天度半出地上陰緯單環與陽經相銜平上爲兩界內外爲周天百刻天頂單環直中國人頂之上東西當卯酉之中稍南使見日出入令與經緯相固如鳥殼之裏黃赤道單環當天之中二十八宿位也雙規運動度穿一穴傍在卯酉之南上去天頂三十六度而橫置之黃道單環設於赤道環內仍開合使運轉東西列周天度數南北列百刻可使見日知時白道月環設於黃道環內使就黃道爲交合以測每夜月離游儀四柱爲龍龍下有山雲俱

在水平槽上皆用銅至元太史郭守敬乃創爲簡儀仰儀  
及圭表景符正方案大明殿燈漏皆古人所未及者又勝  
國四海測景之所凡二十有七東極高麗西至滇池南踰  
朱崖北盡鐵勒亦古人所未及者也又所傳西域儀像  
亦多與古渾天合

主春者鳥星昏中可以種稷主夏者火星昏中可以種黍菽  
主秋者虛星昏中可以種麥主冬者昴星昏中則入山可以  
斬伐具器械王者南面而坐視四星之中而知民之緩急急  
則不賦力役敬授民時

○禮月令疏

鳥星爲春候火星爲夏期專陽相助同精感符

○原刻脫此四字今校增

虛星爲秋候昴星爲冬期陰氣相佐德乃弗邪子助母收母

合子符

○類聚三御覽十八又廿一又廿四又九百十四

按尙書孔疏天道左旋日體右行故星見之方與四時相逆春則南方見夏則東方見秋則北方見冬則西方見此則勢自當然而書緯爲文生說言春夏相與交秋冬相與互謂之母成子子助母斯假妄之談耳 四方皆有七宿各成一形東方成龍形西方成虎形皆南首而北尾南方成鳥形北方成龜形皆西首而東尾計仲春日在奎婁而入於酉地則初昏之時井鬼在午柳星張在巳軫翼在辰是朱鳥七宿皆得見也計仲夏日在東井而入於酉地則初昏之時角亢在午氏房心在巳尾箕在辰是東方七宿皆得見也計仲秋日在角亢而入於酉地則初昏之時斗

牛在午女虛危在巳室壁在辰是北方七宿皆得見也計仲冬日在牽牛而入於酉地則初昏之時奎婁在午胃昂畢在巳觜參在辰是西方七宿俱得見也

歲星木精熒惑火精鎮星土精太白金精辰星水精也心大星天王也其前星太子後星庶子也歲星得度五穀孳熒惑順行甘雨時鎮星得度地無災太白出入當五穀成熟人民

昌

陰稱母也  
○御覽五

按天官五星占歲星蒼帝之子人主之象也歲星農官也主五穀春不勸農則歲星盈縮熒惑主夏赤帝之子方伯之象也爲天候主歲成敗司察妖孽所往有兵鎮星主德女主之象也所居國有德不可以兵加也太白白帝之子



大將之象也一名天相辰星黑帝之子宰相之祥也主德  
常行四仲當出不出天下旱色黃五穀熟色白中謀泄色  
青大臣憂

長沙太守星備云立春歲星王七十二日其色有白光角  
芒土王三月十八日其色黃而大休則圓廢則內虛立夏  
熒惑王七十二日色赤角黃土王六月十八日其色黃而  
大立秋太白王七十二日光芒無角土王九月十八日其  
色黃而大立冬辰星王七十二日其色白芒角土王十二  
月十八日其色黃而大星當王相不芒角其邦大弱強國  
取地大弱失國亡土也又云五星初起牽牛又云歲星一  
日行十二分度之一十二歲而周天熒惑日行三十三分

度之一三十三歲而周天鎮星日行二十八分度之一三十八歲而周天太白日行八分度之一八歲而周天辰星日行一度一歲而周天淮南天文訓太陰在四仲則歲星行三宿太陰在四鉤則歲星行二宿二八十六三四十二故十二歲而行二十八宿日行十二分度之一歲行三十度十六分度之七十二歲而周熒惑常以十月入太微受制而出行列宿司無道之國爲亂爲賊爲疾爲喪爲饑爲兵出入無常辨變其色時見時匿鎮星以甲寅元始建斗歲鎮星一宿當居而弗居其國亡土未當居而居之其國益地歲熟日行二十八分度之一歲行十三度百一十二分度之五二十八歲而周太白元始以正月甲寅與熒

惑晨出東方二百四十日而入入百二十日而夕出西方  
二百四十日而入入三十五日而復出東方出以辰戌入  
以丑未當出而不出未當入而入天下偃兵當入而不在  
當出而不出天下興兵辰星正四時常以二月春分効奎  
婁以五月夏至効東井輿鬼以八月秋分効角亢以十一  
月冬至効斗牽牛出以辰戌入以丑未出二旬而入晨候  
之東方夕候之西方一時不出其時不和四時不出天下  
大饑

春政不失五穀孳初夏政不失甘雨時季夏政不失地無菑  
菑謂土不稼穡秋政不失人民昌冬政不失少疾喪五政不失百穀  
稚熟日月光明晚熟日稚詩曰植稚  
菽麥○御覽二十五春夏民欲早作故令

民先日出而作是謂寅賓出日秋冬民欲早息故令民候日入而息是謂寅餞納日春迎其來秋送其去無不順矣

史陶路

唐紀注以爲帝命驗文

春佩蒼璧乘蒼馬以出遊發令于外春行仁政順天之常以

安國也

御覽十八又四百十九

季夏可以居正殿季夏無出兵秋絕太白是謂大武用時治

兵得功

書鈔百五十四

按周禮疏一年有二十四氣皆節氣在前中氣在後節氣一名朔氣中氣在晦則後月閏中氣在朔則前月閏節氣有人前月法中氣無人前月法中氣匝則爲歲朔氣匝則爲年

淮南子曰先王之政四海之雲至而修封疆蝦蟆鳴燕降而達路除道陰降百泉則修橋梁昏張中則務種穀大火中則種黍菽虛中則種宿麥昴中則收斂畜聚積伐薪木又正月失政七月涼風不至二月失政八月雷不藏三月失政九月不下霜四月失政十月不凍五月失政十一月蟄蟲冬出其鄉六月失政十二月草木不脫七月失政正月大寒不解八月失政二月雷不發九月失政三月春風不濟十月失政四月草木不實十一月失政五月下電霜十二月失政六月五穀疾狂說文卯爲春門萬物已出酉爲秋門萬物已入

抱朴子春向東食歲星青氣使八肝夏服熒惑赤氣使入

心四季之月食鎮星黃氣使入脾秋食太白白氣使入肺  
冬服辰星黑氣使入腎

五百載聖紀符

五百法天地之數也

四千五百六十歲精反初握命乙

起河出圖聖受思

鄭注曰聖謂堯也天握命人當起者河乃出圖帝堯受而思之以受歷數也○初學

記十七御覽四百一  
路史陶唐紀注

按乾坤鑿度孔子曰至德之數先立木金水火土德合三百四歲五德備凡一千五百二十歲大終復初其求金木水火土德日名之法道一紀七十六歲因而四之爲三百四歲以一歲三百六十五日四分乘之凡爲十一萬一千三十六以甲爲法除之餘三十六以三十六甲子始數立立算皆爲甲旁算亦爲甲以日次次之母算者乃木金火

水土德之日也德益三十六五德而止六日名甲子木德  
主春春生三百四歲庚子金德主秋成收三百四歲丙子  
火德主夏長三百四歲壬子水德主冬藏三百四歲戊子  
土德主季夏致養三百四歲六子德四正四正子午卯酉  
也而期四時凡一千五百二十歲終一紀五德者所以立  
尊號論天律志長久

張說握符頌序昔在唐虞之際以斗精受命者七神得四  
均間氣而生者又二十八人所謂三十五際者也禹以金  
德王故夏后之有天下也生數四百年契以水德王故殷  
人之有天下也成數六百年稷以木德王故周人之有天  
下也成數八百年伯益之命中天而堯族以火德乘之故

漢室之有天下也生數再及二百年其間距王而興不能復大禹九州之跡及勝殘百年之命者皆五神之餘氣也  
皐繇降德皇唐復興土精應王厚德載物生數五百成數  
千年命歷有歸此其大較轉算之徒莫能究也緯以入元  
三百四歲爲德運七百六十歲爲代軌千五百二十歲爲  
天地出符四千五百六十歲爲七精返初天人相應合若  
符節

沈約宋書五德更王唯有二家之說鄒衍以相勝立體劉  
向以相生爲義然相勝之說於事爲長若同張蒼黜秦則  
漢水魏土晉木宋金若同賈誼取秦則漢土魏木晉金宋  
火也



天地開闢元歷紀名月首甲子冬至日月五緯俱起牽牛初  
仰觀天形如車蓋日月若懸壁五星若編珠衆星纍纍如連  
貝青龍甲子攝提格孛也。青龍歲也歲在寅曰攝提格孛猶生  
也。初學記一御覽七又十七又八

二百二

按漢歷志伏羲有甲子元歷是太昊已有甲子顓帝歷術  
云天元正月己巳朔旦立春俱以日月起於天廟營室五  
度與月令合

路史顓帝注新歷十三月以爲元歲紀甲寅上日己巳日  
月直艮維之初而五星會於天歷冰始離蟄始動雉三號  
而立春至天曰作時地曰作昌人曰作樂是以萬物應和  
而百事理是爲歷宗

淮南子天一元始正月建寅日月俱入營室五度天一以  
始建七十六歲日月復以正月入營室五度無餘分名曰  
一紀凡二十紀一千五百二十歲大終日月星辰復始甲  
寅元日行一度而歲有奇四分度之一故四歲而積千四  
百六十一日而復合故舍八十歲而復

乾坤鑿度歷以三百六十五日四分度之一爲一歲易以  
三百六十垢當朞之日此律歷數也五歲再閏故再扞而  
後卦以應律歷之數故乾坤氣合戌亥音受二子之節陽  
生秀白之州載鍾名太一之精也其帝一世紀錄事明期  
推移不奪而消焉元歷無名推先紀曰甲寅

宋志云晉劉智推三百年斗歷改憲以爲四分法三百年

而減一日以百五十爲度法三十七爲斗分飾以浮說以扶其理琅邪王朔之以其上元歲在甲子善其術欲以九萬七千歲之甲子爲開闢之始何承天云悼於立意者也冬至日月在牽牛一度求昏中者取六項加三旁蠡順除之

○文選石關銘注

斗二十二度無餘分冬至在牽牛所起

○續漢書律歷志

鄭元注曰盡行十二項中正而分之左右各六項也蠡猶羅也昏中在日前故言順數也明中在日後故言却也據此則旁羅乃測天度之器如今之日晷地羅也十二項者十二時分爲十二方也此可補史記注之遺

晝夜漏之數三十六頃

○隋書天文志無之數二字

按隋志昔黃帝創觀漏水制器取則以分晝夜冬至互起

其首凡有四十一箭晝有朝有禺有中有晡有夕夜有甲乙丙丁戊昏旦有星中每箭各有其數梁天監六年武帝以晝夜百刻分配十二辰辰得八刻仍有餘分乃以晝夜爲九十六刻一辰有全刻八焉至大同十年又改用一百八刻依尙書考靈曜晝夜三十六頃之數因而三之冬至晝漏四十八刻夜漏六十刻夏至晝漏七十刻夜漏三十八刻春秋二分晝漏六十刻夜漏四十八刻昏旦之數各三刻先令祖暅爲漏經皆依渾天黃道日行去極遠近爲用箭日率

通天文者明

明於天道也

審地利者昌

昌猶盛也盛於萬物

明者天之時也

昌者地之財也明王之治鳳凰下之

類聚九十九御覽九百十五

按皇極經世書以元統十萬年爲一元一萬八百年爲一  
會初開一萬八百年而天始開又一萬八百年而地始成  
又一萬八百年而人始生有一元十二會三十運十二世  
十二萬九千六百年爲一元歲月日辰元會運世皆自十  
二而三十自三十而十二堯之時在日甲月己星癸辰甲  
當十二萬九千六百年之中以上爲六萬四千八百年之  
已往以下爲六萬四千八百年之方來是以謂中數也禹  
卽位後八年得甲子初入午會前至元元年甲子初入午  
會第十一運從天開甲子至泰定甲子得六萬八千八百  
二十一年



古微書卷三

尙書帝命驗

賁居子曰帝王之興自有命運五德終始錄圖更承皆  
先革之於天象錯之以地文是故皇帝王伯春夏秋冬  
望氣前知占瑞逆見未有運世無本而得崛起在位矣  
河不圖鳳不至孔子以不王而命驗鍾漢此圖緯之書  
所以著於刪後與不然緯耳緯耳亦何重之云

天有五號尊而君之則曰皇天元氣廣大則稱昊天仁覆閔  
下則稱旻天自上監下則稱上天據遠視之蒼蒼然則稱蒼  
天

○五經異義引  
尙書說非緯文

按說文云天顛也

劉熙釋名云天顯也又云坦也

白虎通天之爲言鎮也居高理下爲人鎮也

楊泉物理論天者旋也均也積陽純剛其體迴旋羣生之所大仰

太元經九天一中天二蕤天三從天四更天五晬天六廓天七咸天八沈天九成天

天宗日月北辰地宗岱河海也日月爲陰陽宗北辰爲星宗

河爲水宗海爲澤宗岱爲山宗

○五經異義引古尚書說非緯文

按尚書疏歐陽及大小夏侯說尚書皆云所祭者六上不謂天下不謂地旁不謂四方在六者之間助陰陽變化實一而名六宗矣孔光劉歆以六宗謂乾坤六子水火雷風



山澤也賈逵以爲六宗者天宗三日月星辰地宗三河海  
岱也馬融云萬物非天不覆非地不載非春不生非夏不  
長非秋不收非冬不藏此其謂六宗也劉歆孔光以爲乾  
坤之六子爲六宗王肅用家語之文以此四時也寒暑也  
日也月也星也水旱也爲六宗許君謹按與古尙書同鄭  
駁之云旣六宗云禋山川言望則六宗無山川明矣大宗  
伯云以禋祀祀昊天上帝以實柴祀日月星辰以槱燎祀  
司中司命風師雨師又祭義曰郊之祭大報天而主日配  
以月則郊天並祭日月可知其餘星也辰也司中也司命  
也風師也雨師也此之謂六宗亦明矣星謂五緯也辰謂  
日月所會十二次也司中司命文昌第五第四星也風師

箕也雨師畢也晉張髦云臣謂禋于六宗祀祖考所尊者  
六三昭三穆是也又劉昭作六宗辨繁故不錄

帝者天號也王者人稱也天有五帝以立名人有三王以正  
度天子爵稱也皇者煌煌也

○初學記九御覽七十一文選西京賦  
書緯又類聚十一

注並以此條  
爲刑德攷文

按乾坤鑿度曰孔子曰易有君人五號也帝者天稱也王  
者美行也天子者爵號也大君者與上行異也大人者聖  
明德備也變文以著名題德以別操

帝者承天立五府以尊天重象也五府五帝之廟蒼曰靈府  
赤曰文祖黃曰神斗白曰顯紀黑曰元矩唐虞謂之五府夏  
謂之世室殷謂之重屋周謂之明堂皆祀五帝之所也

○史記五

帝紀索隱初學記十三御覽五百三十三  
又史記五帝紀正義以唐虞以下爲注文

宋均注云象五精之神也天有五帝集居太微降精以生  
聖人故帝者承天立帝之府是爲天府文祖者赤帝赤熛  
怒之府名曰文祖火精光明文章之祖故謂之文祖周曰  
明堂神斗者黃帝含樞紐之府名曰神斗斗主也土精澄  
靜四行之主故謂之神斗周曰大室顯紀者白帝白招拒  
之府名曰顯紀紀法也金精斷割萬物故謂之顯紀周曰  
總章元矩者黑帝汁光紀之府名曰元矩矩法也水精元  
昧能權輕重故謂之元矩周曰元堂靈府者蒼帝靈威仰  
之府名曰靈府周曰青陽

按禮大傳王者禘其祖之所自出

鄭注曰王者之先祖皆感大微五帝之精以生蒼則靈威仰赤則赤熒怒黃則含樞紐白則白招拒黑則汁光紀皆用正歲之正月郊祭之蓋特尊焉

祭法有虞氏禘黃帝而郊嚳祖顓頊而宗堯夏后氏亦禘黃帝而郊鯀祖顓頊而宗禹殷人禘嚳而郊冥祖契而宗湯周人禘嚳而郊稷祖文王而宗武王

鄭注祭上帝于南郊曰郊祭五帝五神于明堂曰祖宗

明堂月令春曰其帝太昊其神句芒夏曰其帝炎帝其神祝融中央曰其帝黃帝其神后土秋曰其帝少昊其神蓐收冬曰其帝顓頊其神元冥有虞氏以上尙德禘郊祖宗配用有德者而已自夏以下稍用其姓代之先後之次有

虞氏夏后氏宜郊顓頊殷人宜郊契郊咎一帝而明堂祭

五帝小德配寡大德配衆亦禮之殺也

堯夢長人見而論治舉舜于服澤之陽

○路史有虞紀注引書緯

虞舜聖在側陋光曜顯都握石椎懷神珠

椎讀曰鍾鍾平輕重也握謂知玉衡

之道懷神珠喻有聖性也順堯考德題期立象

注曰堯巡省河洛得龜文圖書舜禪習禮題五德之

期立將起之象也○續漢書律歷志後漢書曹褒傳注御覽八十一路史有虞紀注

姚氏縱華感樞

注云縱生也舜母姚氏感樞星之精而生舜重華○初學記九

舜受終赤鳳來儀

○御覽九百十五

按路史帝堯碑云其先出於塊隴翼火之精有神龍首出

於常羊慶都交之生伊堯不與凡等龍顏曰角眉八彩謖

自侯伯游于元河龍龜負銜投鈐授與然後受命堯母碑

云三土爲堯壤也惟土能壤卽爲饒饒後下加乃人字象引乞之

按尸子云舜兩童子是謂重明作事成法出言成章夫舜蒿也蔓地蓮華之名有睽曜意故曰好動而曰舜或作瞬公孫尼子云舜牧羊於潢陽堯舉之以爲天子

干寶云舜耕歷山獲玉歷於河際之巖知天命之在己體道不倦

墨子云堯教化及雕題蜀越撫交趾身涉流沙地封獨山西見王母訓及大夏渠搜北中幽都及狗國與人身而鳥面及焦僇

尸子云虞舜灰於常羊什器於壽邱就時負夏未嘗暫息

頓邱買貴於是販於頓邱傳虛賣賤於是債於傳虛以均救之

類林云叟填井後兩目方瞽又云舜耕歷山歲不熟舜糶其父詣糶每還錢與米問之子也因相抱泣拭其父目尋自明堯聞而妻之貞源亦云糶于平陽市父認之乃舐其目日以光明

呂氏春秋曰堯以天下讓舜鯀爲諸侯怒於堯曰得天之道者爲帝得地之道者爲三公今我得地之道而不以我爲三公以堯爲失論欲得三公乃使猛獸欲以爲亂比獸之角能以爲城舉其尾能以爲旌召之不來仿佯於野以患帝舜於是殛之於羽山副之以吳刀禹不敢怨而反事

之官爲司空

白帝精以星感修已出行見流星貫昴感生妣戎文命禹

注星

金精嫫禹氏感生戎地名文命也

○御覽八十二路史夏后紀注

禹身長九尺有只虎鼻河目鯢齒鳥喙耳三扇戴成鈴襄玉

斗雲準聽云有人出石夷握地代戴成鈴懷玉斗注妣氏云

禹胸有黑如北斗鄭謂懷璇璣玉衡之道戴鈴謂有骨表

如鉤鈴

玉盥履已

世紀云首戴鈴虎鼻大口足

星也 履已 語見路史夏后紀

按吳越春秋鯀娶於有莘氏之女名曰女嬉年壯未孳嬉  
于砥山得薏苡而吞之意若爲人所感因而妊孕剖脇而  
產高密家于西羌地曰石紐石紐在蜀西川也

水經注禹生於蜀之廣柔縣石紐村今之石泉縣也

路史初鯀納有莘氏曰志是爲修已年壯不字獲若石于



石紐服媚之而遂孕歲有二月以六月六日屠鬴而生禹  
於棘道之石紐鄉所謂刳兒坪者蜀本紀作痢兒畔夷人  
共營其地方百里不敢處及畜牧有罪者逃之捕者不逼  
三年則原之畏禹之神亦猶窮山不敢西射畏軒轅之邱  
也

真仙通鑑夏禹治水隨山濬川老君遣雲華夫人往陰相  
之時禹駐巫山之下大風卒至崖谷振隕力不可制忽遇  
雲華夫人禹拜而求助夫人卽敕侍女授禹策召鬼神之  
書因命其神狂章虞余黃麾大翳庚辰童律巨靈神等助  
其斬石疏波決塞道阨禹嘗謁雲華於崇巘之巔顧眄之  
際化而爲石或倏然飛騰散爲輕雲油然而止聚爲夕雨

或爲遊龍或爲翔鶴千態萬狀不可親也

十洲記昔禹治洪水旣畢乃乘躡車度弱水而到鐘山祠上帝於北阿歸大功於九天

又吳越春秋禹三十未娶行到塗山恐時之暮失其度制乃辭云吾娶也必有應矣乃有白狐九尾造於禹禹曰白者吾之服也其九尾者王之證也塗山之歌曰綏綏白狐九尾疵疵我家嘉夷來賓爲王成家成室我造彼昌天人之際于茲則行明矣哉禹因娶塗山謂之女嬌取辛壬癸甲禹行十月女嬌生子啓啓生不見父晝夕呱呱啼泣禹崩之後衆瑞並去天美禹德而勞其功使百鳥還爲民田大小有差進退有行一盛一衰往來有常

桀無道殺關龍逢絕滅皇圖壞亂歷紀

皇天也紀綱紀也天之圖歷龍逢引以諫

也桀也殘賊天下賢人逃遁

避時也

淫色慢易男女無別不事祖宗桀失

玉鏡用其噬虎

注玉鏡喻清明之道噬虎喻其暴虐也○御覽八十二路史夏后紀注

按太公金匱桀怒湯以諛臣趙梁計召而囚之均臺寘之種泉嫌於死湯乃行賂桀遂釋之而賞之贊茅夏桀之時有岑山之水桀常以十月發民鑿山穿林通於河民諫曰孟冬鑿山穿陵是泄天氣發地之藏天子失道後必敗桀殺之期年岑山崩爲大澤湯率諸侯伐之

太任生子昌時季秋之月甲子有赤雀銜丹書入于酈止于昌戶其書云敬勝怠者吉怠勝敬者滅義勝欲者從欲勝義者凶凡事不强則枉不敬則不正枉者廢滅敬者萬世以仁

得之以仁守之其量百世以不仁得之以仁守之其量十世以不仁得之不仁守之不及其世

○史記周本紀正義

按宋書志初黃帝之世讖言曰西北爲王期在甲子昌制命發行誅旦行道及公劉之後十三世而生季歷季歷之十年飛龍盈於殷之牧野此蓋聖人在下位將起之符也季歷之妃曰太任夢長人感已浚於豕牢而生昌是爲周文王龍顏虎肩身長十尺胸有四乳大王曰吾世當有興者其在昌乎

季秋之月甲子赤雀銜丹書入鄴止昌戶昌拜稽首至于磻谿之水呂尙釣涯王下趨拜曰望公七年乃今見光景于斯答曰望釣得玉璜刻曰姬受命呂佐旌遂置車左王躬執驅

號曰師尙父

御覽八十四

按宋書志文王之妃曰太妣夢商庭生棘太子發植梓樹于闕間化爲松栢檝柞以告文王文王幣率羣臣與發並拜吉夢季秋之甲子赤爵銜書及豐置于昌戶昌拜稽首受其文要曰姬昌蒼帝子亡殷者紂王將畋史編卜之曰將大獲非熊非羆天遺汝師以佐昌臣太祖史疇爲禹卜畋得皐陶其兆如此王至於磻谿之水呂尙釣于涯王下趨拜曰望公七年乃今見光景于斯尙立變名答曰望釣得玉璜其文要曰姬受命昌來提撰爾雒鈐報在齊尙出游見赤人自雒出授尙書命曰佐昌者子

潛夫論曰太妣有吉夢文王不敢康吉祀于羣神然後占

子明堂並拜吉慶修發戒懼聞喜若憂故能成吉以有天  
下號公夢見蓍收賜之土田自以爲有吉因史歸令國賀  
夢聞憂而喜故能成凶以滅其封

赤爵銜丹書止于昌戶民踰山穿穴老幼相扶歸者八十萬

戶

○書  
鈔地

按瑯嬛記南方有比翼鳳飛止飲啄不相分離雄曰野君  
雌曰觀諱總名曰長離言長相離著也此鳥能通宿命死  
而復生必在一處紂時集於長桐之上人以爲雙頭鳥不  
祥及文武興始悟曰此並興之瑞也

賁居子曰河不圖鳳不至孔子以爲悲信帝王運數之  
不偶也顧河洛雖著有圖無文今周室丹書則灼灼七

十八字夫蒼頡初作書鬼且夜哭是天帝惡人之作書也天既惡人之書此七十八字必將如雲龍之篆幻不可識又誰爲東哲而識奇字耶使在後世則以爲魚腹書狐鳴書甚則爲天書之誚而已矣古之世帝何其神而民何其愚易惑也然以雁帛書燕足書推之則此丹書母亦當時有幻術畸人繫書赤雀偶炫其奇而此雀偶集於昌之戶遂以爲神聖之符未可知也又不然便佞臣皆能爲之爾

有人雄起戴玉英

鄭注玉英寶物之名戴之謂骨表

履赤子

鄭注赤子瑞星名

祈旦

失籥亡其金虎

祈讀口哲白也謂秦也旦失籥戶將開金白虎獸之長喻秦君

東南紛紛注

精起

紛紛動擾之貌注星之精起謂劉氏也

昌光出軫已圖之

鄭元注謂火星當起翼軫之野

○初學記九御覽七又八十七

天鼓動玉弩發驚天下

注曰秦野有枉矢星形似弩其星西流天下見之而驚呼賤類出

高將下

賤類謂秦始皇也呂不韋之妻任身而秦襄王納之生始皇高謂丞相趙高始皇出趙高下言天生之也

○類聚六十書鈔百廿五御覽七又三百四十八

賊起蜚卯生虎

注賊始皇虎高祖 卯金出

軫握命孔符

卯金劉字之別軫楚分野之星符圖劉所握天命孔子制圖書○御覽八十七引賊起二句爲

帝命驗文卯金二句爲考靈曜文孫氏合之誤

秦失金鏡魚目入珠

鄭元曰金鏡喻明道也始

皇呂不韋子言亂真也○初學記廿五書鈔百三十六御覽八十六又七百十七並以爲考靈曜文

河圖子

提期地留赤用藏龍吐珠

鄭注曰河圖子劉氏而提起也藏祕也珠寶物喻道也赤漢當用天

之祕道故河龍吐珠也○初學記九又七御覽八百二並以爲考靈曜文

按王命論初劉媪妊高祖而夢與神遇震電晦冥有龍蛇

之怪及長而多靈有異於衆是以王武感物而折契呂公



觀形而進女秦皇東游以厭其氣呂后望雲而知所處始受命則白蛇分西入關則五星聚故淮陰留侯謂之天授非人力也

又按乾坤鑿度孔子曰推卽位之術乾坤三上中下坤變初六復曰正陽在下爲聖人故一聖二庸三君子四庸五聖六庸七小人八君子九小人十君子十一小人十二君子十三聖人十四庸人十五君子十六庸人十七聖人十八庸人十九小人二十君子二十一小人二十二君子二十三小人二十四君子二十五聖人二十六庸人二十七君子二十八庸人二十九聖人三十庸人三十一小人三十二君子三十三小人三十四君子三十五小人三十六

君子三十七聖人三十八庸人三十九君子四十小人四十一聖人四十二庸人孔子曰極至德之世不過此乾三十二世消坤三十六世消代聖人者仁繼之者庸人仁世淫庸世狠又曰日者提不者殆易物之慎命不在

雖有錄圖所當

王必待日旁有氣提之者乃復可起也作者霸橫者距命無此氣者且當止雖有錄圖第且弗順

歷握執并投者上契輔摘推失排紕者咸名紀所錯中與

用材毀苴

作與橫與錯者三皆旁氣名投摘亡排紕蓋爲反氣投天投力之屬摘亡微也排紕納也伯者

齊桓晉文也距之若秦始皇者契輔推契而輔之也若夏太康之昆弟苴始毀者當任用英才之臣毀者八風之時所行之見異皆有云爲下行則上毀五行旋代出輔運相距與更用事終始

相討期有從至有餘運有託除要有知衙合七八以視璇

璣審矣

接拒相錯之言也記除衙言命長短在改之也

卷三終

古微書卷四

尚書五行傳

此篇伏生大傳引以傳洪範班固五行志亦祖之以徵五行遡其來自緯書則大禹之文也緯書獨此爲完簡耳

維王后元祀帝令大禹步于上帝

步推也

維時洪祀六沴用咎

于下是用知不畏而神之怒若六沴作見若是共禦帝用不差神則不怒五福乃降用章于下若六沴作見若不共禦六伐既侵六極其下禹乃共辟厥德受命休令爰用五事建用皇極長事一曰貌貌之不恭是謂不肅厥咎狂厥罰常雨厥極惡時則有服妖有龜孽有雞禍有下體生於上之疢青眚

青祥維金沴木次二事曰言言之不從是謂不义厥咎僭厥  
罰常陽厥極憂時則有詩妖有介蟲之孽有大禍有口舌之  
痾白眚白祥維木沴金次三事曰視視之不明是謂不愆厥  
咎茶也緩厥罰常燠厥極疾時則有草妖有倮蟲之孽有羊禍  
有目痾赤眚赤祥維水沴火次四事曰聽聽之不聰是謂不  
謀厥咎急厥罰常寒厥極貧時則有鼓妖有魚孽有豕禍有  
耳痾黑眚黑祥維火沴水次五事曰思心思心之不容是謂  
不聖厥咎零厥罰常風厥極凶短折時則有脂夜夜讀之妖  
有華孽有牛禍有心腹之痾黃眚黃祥金木水火沴土王之  
不極是謂不建厥咎瞽厥罰常陰厥極弱時則有射妖有虵  
龍之孽有馬禍有下人伐上之痾日月亂度星辰逆行維五

位復建辟厥沴曰二月三月維貌是司四五月視六七月言

八九月聽十十一月思心十二月與正月王極凡六沴之作

歲月日之朝則后王受之歲月日之中則正卿受之歲月日

之夕則庶民受之其二辰以次相將其受之星辰莫同是離

逢非沴維鮮之功禦貌於喬忿言於訖衆視於忽似聽於恍

攸思心於有尤王極於宗始以其月從其禮祭之參乃從其

事禮曰格祀格祀篇名也曰某也方祀曰播讀曰蕃國宰相行祀其

祀也曰若爾神靈洪祀六沴是合無差無傾無有不正若民

有不敬事則會批之六沴六事之機以垂示我民人無敢不

敬事上下王祀儀禮經傳通解續十六田獵不宿飲食不享出入不

節奪民農時及有姦謀則木不曲直棄法律逐功臣殺大子

以妾爲妻則火不炎上治宮室飾臺榭內淫亂犯親戚侮父兄則稼穡不成好戰攻輕百姓飾城郭侵邊境則金不從革簡宗廟不禱祠廢祭祀逆天時則水不潤下

○御覽八  
百七十四

按管子幼官圖若因處虛守靜人物則皇五和時節君服黃色味甘味聽宮聲治和氣用五數飲於黃后之井以俶獸之火爨藏溫濡行毆養坦氣修通春行冬政肅行秋政雷行夏政則閭十二地氣發戒春事十二小卯出耕十二天氣下賜與十二義氣至修門閭十二清明發禁十二始卯合男女十二中卯十二下卯三卯同事八舉時節君服青色味酸味聽角聲治燥氣用八數飲於青后之井以羽獸之火爨藏不忍行毆養坦氣修通夏行春政風行冬政

落重則雨雹行秋政水十二小郢至德十二絕氣下下質  
賞十二中郢賜與十二中絕收聚十二大暑至盡善十二  
中暑十二小暑終三暑同事七舉時節君服赤色味苦味  
聽羽聲治陽氣用七數飲於赤后之井以毛獸之火爨藏  
薄純行篤厚坦氣修通秋行夏政葉行春政華行冬政耗  
十二期風至戒秋事十二小卯薄百爵十二白露下收聚  
十二復埋賜子十二始節賦事十二始卯合男女十二中  
卯十二下卯三卯同事九和時節君服白色味辛味聽商  
聲治濕氣用九數飲於白后之井以介蟲之火爨藏恭敬  
行搏銳坦氣修通冬行秋政霧行夏政雷行春政烝泄十  
二始寒盡刑十二小榆賜子十二中寒收聚十二中榆大

收十二寒至靜十二大寒之陰十二大寒終三寒同事六  
行時節君服黑色味鹹味聽徵聲治陰氣用六數飲於黑  
后之井以麟獸之火爨藏慈厚行薄純坦氣修通

五行篇睹甲子木行御天子不賦不賜賞而大斬伐傷君  
危不殺太子危家人夫人死不然則長子死七十二日而  
畢睹丙子火行御天子敬行急政旱札苗死民厲七十二  
日而畢睹戊子土行御天子修宮室築臺榭君危外築城  
郭臣死七十二日而畢睹庚子金行御天子攻山擊石有  
兵作戰而敗士死喪執政七十二日而畢睹壬子水行御  
天子決塞動大水王后夫人薨不然則羽卵者嘍毛胎者  
牘臃婦銷棄草木根本不美七十二日而畢也



又淮南天文訓甲子氣燥濁丙子氣燥陽戊子氣濕濁庚子氣燥寒壬子氣清寒丙子干甲子蟄蟲早出故雷早行戊子干甲子胎天卯鰕鳥蟲多傷庚子干甲子有兵壬子干甲子春有霜戊子干丙子霆庚子干丙子夷壬子干丙子雹甲子干丙子地動庚子干戊子五穀有殃壬子干戊子夏寒雨霜甲子干戊子介蟲不爲丙子干戊子大旱菰封燠壬子干庚子大剛魚不爲甲子干庚子草木再死再生丙子干庚子草木復榮戊子干庚子歲或存或亡甲子干壬子冬乃不藏丙子干壬子星墜戊子干壬子蟄蟲冬出其鄉庚子干壬子冬雷其鄉 又素問五常篇岐伯曰木曰敷和火曰升明土曰備化金曰審平水曰靜順帝曰

其不及奈何岐伯曰木曰委和火曰伏明土曰卑監金曰從革水曰潤流帝曰太過何謂岐伯曰木曰發生火曰赫曦土曰敦阜金曰堅成水曰流衍

搜神記曰天有五氣萬物化成木清則仁火清則禮金清則義水清則智土清則信五氣盡純聖德備也木濁則弱火濁則淫金濁則暴水濁則貪土濁則頑五氣盡濁民之下也中土多聖人和氣所交也絕域多怪物異氣所產也  
尚書璇璣鈴

或亦載歷象之奧祕而術已亡傳矣

禹導江水決岷山流九貢

注云九貢九州之貢○御覽四十

禹開龍門導積石元圭出刻曰延喜玉王受德天錫佩

禹功既成

天出元圭以賜之古者以德佩禹有治水功  
故天佩以元圭○類聚十一御覽八十二

湯受金符帝錄白狼銜鉤入殷朝注云鉤縛束之要明得天  
下之要也○類聚十二御

覽八  
十三

述堯世放唐文

○續漢書  
律歷志

日旁氣白者爲虹日旁赤青者爲霓

○御覽十四以  
爲考靈曜注文

太白經天水決江

○御覽八百七十  
五以爲考靈曜文

流星色青赤名天雁其所墜處兵起天雁軍甲之精華也○事

詞類奇  
天類

其說皆見春秋緯

孔子求書得黃帝元孫帝魁之書迄于秦穆公凡三千二百  
四十篇斷遠取近定可以爲世法者百二十篇以百二篇爲

尚書十八篇爲中候

○尚書序疏引書緯

尚者上也書者如也

○四字別見尚書序疏詳其文義當在如天行之上

上天垂文

象布節度書也如天行也

○類聚五十五

一作上天垂文以布節度

如天行也

○史通

書務以天言之因而謂之書加尚以尊之

○尚書序疏

是爲尚書篇題號

○類聚五十五在尚者也之上無是爲二字

按尚書疏鄭元云尚者上也尊而重之若天書然蓋元依書緯以尚字是孔子所加故書贊曰孔子乃尊而命之曰尚書璇璣鈴云因而謂之書加尚以尊之

洞冥記云李充馮翊人自言三百歲從始皇發會稽望江海少好學爲博士門徒萬人伏生時年十歲乃就充石壁中受尚書以口傳授伏子四代之事略無遺脫伏子因而

誦之常以繩十餘尋縛腰誦一徧一結十尋之繩皆繩結  
矣誦記之數萬徧且云食穀損人精慧故有遺失伏子今  
所傳百卷得其一矣堯舜二典所闕殊多帝聞神異乃聘  
徵充衣荷草奮負五嶽真形圖而至帝禮待之亦號負圖  
先生

尙書刑德放

益○詩閼宮疏作稷爲司馬禹爲司空聖帝卽位三公象

三能矣書能古台字○鈔五十禹長於地理水泉九州得括象圖故

堯以爲司空○類聚四百十七御覽二百八

火者陽也烏有孝名武王卒大業故烏瑞臻○類聚九十九御覽九百廿引

東方春龍房位其規仁好生不賊其帝青表聖明行趨德

類

聚三引  
書緯

涿鹿者竿人頭也黃帝殺之涿鹿之野身首異處故別葬豈

竿其首於涿鹿地乎

○路史蚩尤傳注疑黃帝以  
乃羅氏語非緯書本文

涿鹿者竿

人頭也鯨者馬鯨竿人面也臚者脫去人之臚也臚罰之屬

五百象七精宮者女子淫亂執置宮中不得出也割者丈夫

淫割其勢也

○御覽六  
百四十八

劓象七政日月五星應政變易臚象七精宿變易卽氣色生

也墨象斗華

○書鈔  
四十四

尙書運期授

白帝之治六十四世其亡也枉矢射參

○御覽八百七十  
五路史夏后紀注

黑帝亡二日並出

御覽三以爲考靈曜文

桀失玉鏡用其噬虎

注云玉鏡謂清暘之道噬虎喻暴虐也此條已見帝命驗篇

房四表之道

宋均云四星間有三道日月五星所從出入也史記天官書素隱

按古今占日月行房三道其政太平行上道昇平行中道霸世行下道可視瞻之短於歷舊影爲行上道與歷合爲行中道長於舊影爲行下道

尙書帝驗期

西王母於大荒之國得益地圖慕舜德遠來獻之

玉海地理門

王母之國在西荒凡得道授書者皆朝王母於崑崙之闕

覽六百六十一





古微書卷五

尚書中候

謹按隋志河洛七經緯合八十一篇又有尚書中候洛  
罪級五行傳雜讖等書則中候屬讖不屬緯矣其說云  
孔子求尚書以其十八篇爲中候以故漢世之學緯候  
並稱考梁志八卷隋惟五卷今所見寥寥數則耳握河  
摘洛倘皆其篇目之遺用繁厥族

天地開闢甲子冬至日月若懸璧五星若編珠

○初學記  
御覽一

黃帝時天氣休通五行期化鳳凰巢阿閣謹於樹

○御覽九  
百十五

黃帝巡洛龜書赤文成字象軒

○路史黃  
帝紀注

黃帝軒提象配永循機

軒轅黃帝名永長也循順也黃帝軒  
轅觀攝提之象配而行之以長爲順

斗機爲政焉

天地休通五行期化

休美也天地美氣應四時之變

河出龍圖洛出

龜書曰威赤文綠字以授軒轅

一本河龍圖出洛龜書感無曰威二字○類聚九十八御

覽七十九

黃帝時麒麟在囿鸞鳥來儀

○御覽八百八十九又類聚九十八在上條配永循環機之下

賁居子按黃帝有土德之瑞黃龍地螾見也螾土精大

五六圍長十餘丈螾卽蚓也河圖說徵篇黃帝起大螾

見帝王世紀黃帝時螾大如虹使在後世豈不爲災怪

之尤而聖世輒以爲瑞要之天亦何心也然則石虎時

之芝草數萬蒼麟十五吾未知其爲不祥也

帝堯卽政七十載景星出翼鳳凰止庭

鄭注景大也翼朱鳥宿也

朱草生

郊嘉禾孳連甘露潤液醴泉出山

朱草可以染服者嘉美也書序曰唐叔得禾異畝同

額修壇河雒仲月辛日昧明禮備榮光出河休氣四塞休美也榮

光五色從河水出美白雲起回風搖龍馬銜甲赤文綠色龍形

象馬也赤標怒之使也甲所臨壇止霽吐甲圖而甕霽亦止也甕音

帶去也○初學記九御覽八十又八百七十二又八百九十三

堯時龍馬銜甲赤文綠色臨壇上甲似龜背廣袤九尺圓理

平上五色文有列星之分斗正之度帝王籙紀興亡之數類○

聚十一又九十九左傳序疏論語子罕疏

堯率羣臣東沈璧於洛退俟至於下稷赤光起元龜負圖出

背甲赤文成字止壇稷讀曰側○初學記六又九

堯卽政七十載稷爲大司馬舜爲太尉○二句別見御覽二百九德政清

平比隆伏羲鳳凰巢于阿閣驩林○路史陶唐紀注又諸卷阿疏引鳳凰句以爲中候

握河  
紀文

堯卽政七十年鳳凰止于庭伯禹拜曰昔帝軒提象鳳凰巢

阿閣

○御覽九百十五初學記二十又全傳昭十  
年疏路史黃帝紀注並以爲中候握河紀文

堯祇德匪懈醴泉出文命盛德俊又在官醴泉出山

醴甘也  
取名醴

酒○御覽八  
百七十三

文命盛德俊又在官則朱草生郊

○御覽八  
百七十三

堯沈璧於洛赤光起有元龜負書出背甲赤文成字止壇上

堯沈璧於河黑龜出赤文題

○初學記三十類聚九  
十九御覽九百三十一

按述異記堯爲仁君一日十瑞宮中芻化爲禾鳳凰止於

庭神龍見於宮沼歷草生堦宮禽五色鳥化白神木生蓮

蓬蒲生廚景星耀於天甘露降於地是爲十瑞 兔園策

註堯時三年耕餘一年之食謂之升平九年耕餘三年食謂之登平二十年耕餘七年食謂之太平

舜沈璧於河榮光休至黃龍負圖舒卷出入壇畔

○類聚九十八

按淮南子堯之時十日並出焦禾稼殺草木而民無所食  
契獯鬻齒齒九嬰大風封豨修蛇皆爲民害堯乃使羿誅  
齒於疇華之野殺九嬰於凶水之上繳大風於青邱之澤  
上射十日而下殺契獯斷修蛇於洞庭擒封豨於桑林萬  
民皆喜置堯以爲天子於是天下廣狹險易遠近始有道  
里舜之時共工振滔洪水以薄空桑龍門未開呂梁未發  
江淮通流四海溟滓民皆上邱陵赴樹木舜乃使禹疏三  
江五湖闢伊闕導瀍澗平通溝陸流注東海鴻水漏九州

乾萬民皆寧其性是以稱堯舜以爲聖

賁居子曰堯之業多不傳者而舜之有功至等于大禹亦所未聞且云洪水爲共工所播上古何多怪也不有絕怪之孽亦不足以徵絕聖之功

初堯在位七十載矣見丹朱之不肖不足以嗣天下乃求賢以異於位至夢長人見而論治舜之潛德堯實知之於是疇咨於衆詢四嶽明明揚仄陋得諸服澤之陽

○語見路史有虞紀

堯之長子監明蚤死不得立監明之嗣封于劉朱又不肖而

弗獲嗣

按此堯之後所謂劉累者也夏后世之豢龍而漢之所祖也呂覽曰堯有子十人不與其子而與舜舜有子九人不

# 與其子而授禹

伯禹在庶

伯官既號曰禹因爲德諡庶人也

四嶽師舉薦之帝堯

四嶽四方諸侯也師

衆也薦

握括命不試爵授司空

禹握括地象天已命之故不復試以衆官司空於周爲冬

進也

伯禹稽首讓于益歸

稽首拜頭至地益歸賢者堯臣歸讀曰夔帝

曰何斯若真

何不聘讓之辭斯此也若汝也此汝真其人

出爾命圖示乃天

爾汝

方讓隱之故曰出汝所受天命也圖括地象

伯禹曰臣觀於

河河伯面長人首魚身出曰吾河精也

觀河觀于河水也

授臣河圖

釐入淵

河圖謂括地象釐去也

伯禹拜辭

禹將行故拜去○御覽八十二又八百七十二

禹理洪水觀於河見白面長人魚身出曰吾河精也授禹河

圖而還於淵

○語見水經河水注

按吳越春秋禹傷父功不成循江汭河盡濟甄淮乃勞身

焦思以行七年聞樂不聽過門不入冠挂不顧履遺不躡  
功未及成愁然沈思乃案黃帝中經歷蓋聖人所記曰在  
於九山東南天柱號曰宛委赤帝左闕其巖之巔承以文  
玉覆以磐石其書金簡青玉爲字編以白銀皆琢其文禹  
乃東巡登衡嶽血白馬以祭不幸所求禹乃登山仰天而  
嘯因夢見赤繡衣男子自稱元夷蒼水使者聞帝使文命  
于斯故來候之非厥歲月將告以期無爲戲吟故倚歌覆  
釜之山東顧謂禹曰欲得我山神書者齋於黃帝巖嶽之  
下三月庚子登山發石金簡之書存矣禹退又齋三月庚  
子登宛委山發金簡之書案金簡玉字得通水之理復返  
歸嶽乘四載以行川始於霍山徊集五嶽詩云信彼南山



惟禹甸之遂巡行四瀆與益夔共謀行到名山大澤召其神而問之山川脈理金玉所有鳥獸昆蟲之類及八方之民俗殊國異域土地里數使益疏而記之故名之曰山海經

元女兵法禹問于風后曰吾聞黃帝有勝負之圖六甲陰陽之道今安在乎風后曰黃帝藏會稽之山下其坎深千丈廣千丈鎮以磐石致難得也禹北見六子問海口所出禹乃決江口鳴角會稽龍神爲見玉匱浮出禹乃開而視之中有天下經十二卷禹未及持之其四卷飛上天禹不能得也其四卷復下陂池禹不能及也禹得中四卷開而視之自古之功莫奇于禹矣則呼召神鬼鞭撻風霆理

應有之不得爲誤

夏桀無道枉矢射山亡土崩

○御覽八百七十五又八百七十七

桀爲無道地吐黃霧

○御覽十五又八百七十八

按世紀湯禽桀於焦門放之歷山乃與末嬉及嬖妾同舟浮海奔南巢之山

述異記曰夏桀宮中有女子化爲龍不可近俄而復爲婦人甚麗而食人桀命爲蛟妾告桀吉凶又曰桀時泰山山走石泣先儒說桀之將亡泰山三日泣今泰山山石遠望之若人泣蓋是也

元鳥翔水遺卵娥簡易拾吞生契封商後萌水易

注云易疑浴娥簡在

水中浴而吞卵生契後人當天應嘉乃以水易爲湯○禮月令疏路史高辛紀注

又曰元鳥翔水

遺卵于流城簡拾吞生契封商

○御覽八十三又詩生民疏元鳥疏並以爲中候契握篇

契後十三世生主癸主癸之妃曰扶都見白氣貫月意感以乙日生湯號天乙

按乾坤鑿度孔子曰自成湯至帝乙帝乙湯之元孫之孫也此帝乙卽湯也殷錄質以生日爲名順天性也元孫之孫外絕恩矣同以乙日生疏可同名湯以乙生嫁妹本天地正夫婦夫婦正則王教興矣故曰易之帝乙爲成湯書之帝乙六世王同名不害以明功

賁居子曰昔者桀名履癸而湯之稱亦云予小子履足以知古人之質矣

湯牽白狼握禹籙

○類聚九十九

天乙在亳諸鄰國襁負歸德東觀于洛習禮堯壇降三分沈

璧降下也以厚三分之璧玉沈雒水

退立榮光不起黃魚雙躍出濟於壇魚者

無足翼言桀孤特無黨可伐也黃者土色土所以過水今土歸湯雖祭猶爲位告神故有壇

黑烏以雄黑烏

叶光紀之隨魚亦止化爲黑玉赤勒文曰元精天乙受神福

伐桀克三年天下悉合

○類聚十二御覽八十三又詩商頌譜疏以爲中候雒子命文

按呂覽曰桀爲無道天下顛恐千辛任威國人大崩湯欲

合伊尹往視曠夏恐其不信湯乃自射伊尹伊尹奔夏三

年反報於亳曰桀迷於妹嬉好彼琬琰不恤其衆民心積

怨皆曰上天不恤夏命其卒湯與伊尹盟以示必滅夏伊

尹又往視曠夏聽于妹嬉之言以告湯湯夏車七十乘必

死六千人以戊子戰於郟遂禽移大犧登自鳴條乃入巢門遂有夏民大悅親鄣如夏

按管子曰女華者桀之所愛也湯事之以千金曲逆者桀之所善也湯事之以千金內則有女華之陰外則有曲逆之陽陰陽之議合而得成其天子此湯之陰謀也

賁居子曰信斯言則伊尹與妹嬉比而亡夏固不謬矣陰謀之端乃開于聖人乎雖然非聖人亦不可以用陰謀

殷紂時十日雨土於亳紂卒國滅

○御覽八百七十七

紂末年雨石皆大如甕

按劉向別錄辛甲事紂七十五諫不聽而去召公與語賢

之告文王親自迎之以爲公卿封於長子

淮南子曰紂爲無道左強在側太公並世故武王之功立太公釣于磻谿夜夢北斗神告以伐紂之意

文王遊磻谿之水呂尚釣于涯王下拜曰切望公七年

○原脫

此五字今校增

乃今見光景于斯尚曰望釣得玉璜刻曰姬受命呂

佐旌德合昌來提撰爾雒鈐報在齊

原刻脫此十字今校增○類聚十又八十

三御覽八百七十五文選勸進今上幾注又詩大明疏以爲中候雒師謀文

按竹書紀年言王將畋史編卜之曰將大獲非熊非羆天

遺汝師以佐昌臣大祖史疇爲禹卜畋得皐陶其兆類此

王至于磻谿之水呂尚釣于涯王下趨拜曰望公七年乃

今見光景于斯尚立變名答曰望釣得玉璜其文要曰姬

受命昌來提撰爾洛鈐報在齊尙出遊見赤人自洛出授  
尙書命曰呂佐昌者子

又說苑云呂望年七十釣于渭渚三日三夜魚無食者望  
卽忿脫其衣冠上有農人者古之異人謂望曰子姑復釣  
必細其綸芳其餌徐徐而投無令魚駭望如其言初下得  
鮒次得鯉刺魚腹得書書文曰呂望封於齊望知其異

周文王爲西伯季秋之月甲子赤雀銜丹書入酆鄙止於昌

戶乃拜稽首受最最要言也曰姬昌蒼帝子亡殷者紂也○類聚十又九

十九御覽廿四又九百廿二又周禮大祝疏詩文王疏公羊傳隱元年疏並以爲中候我應篇文

按竹書文王夢日月著其身又鸞鸞鳴于岐山孟春六旬  
五緯聚房後有鳳皇銜書游文王之都書文曰殷帝無道

虐亂天下星命已移不得復久靈祇遠離百神吹去五星聚房昭理四海

文王廢伯邑考立發爲太子王曰修我道德紀後恒稱太

子發

○初學記十

文王廢考立發爲太子

○白虎通爵篇按此句已見上條中

維王旣誅崇侯虎諸侯貢萬民咸喜

鄭元曰王文王也貢貢國異物色也○御覽四

百六十七

文王曰我終之後恒稱太子河洛復告遵朕稱王

○原刻脫此八字今

校增○詩文王疏以爲中候我應篇文

太子發以紂存三仁附卽父位不稱

王

文王得赤雀丹書改號以未行謙不自成故稱太子

應天道未成而崩武王以天誅明統緒而未成王○此二句又

見

子稱太子發明愼父以明卒考

文王命武王我終之後恒稱太子者明愼文王

之命也○御覽百四十六



太子發以紂存三仁附卽位不稱王渡于盟津中流受文命

待天謀白魚躍入王舟王俯取魚長三尺赤文有字題目下

名授右有火自天止于王屋流爲赤烏五至以穀俱來赤烏

成文雀書之福○類聚十又十二御覽八十四又一作有火

自上復於王屋流爲烏其色赤其聲魄○類聚九十九

發行誅紂旦宏道也是七百年之基驗也○禮櫛

武王觀於河沈璧禮畢且退至於日旰榮光幕河青雲浮洛

青龍臨壇銜元甲之圖吐之而去○初學

按克殷解周車三百五十乘陳于牧野帝辛從武王使尙

父與伯夫致師王旣以虎賁戎車馳商師商師大敗商辛

奔內登于廩臺之上屏遮而自燔于火武王乃手大白以

麾諸侯諸侯畢拜遂揖之商庶百姓咸俟于郊羣賓僉進  
曰上天降休再拜稽首武王答拜先入適王所乃剋射之  
三發而後下車而擊之以輕呂斬之以黃鉞折懸諸太白  
適二女之所乃旣縊王又射之三發乃右擊之以輕呂斬  
之以元鉞懸諸小白乃出場於厥軍又世俘解時甲子夕  
商王紂取天智玉琰璫身厚以自焚凡厥有庶告焚玉四  
千五百武王乃俾于千人求之四千庶則銷天智王五在  
火中不銷凡天智玉武王則寶與同凡武王俘商舊玉億  
有百萬

賁居子曰武王入殷三日五災不之忌而白魚赤鳥顧  
獨爲瑞然則災與瑞亦何定論

周成王舉堯舜之禮沈璧於河白雲起而青雲浮乃有蒼龍

負圖臨河

御覽八路史餘論六

成王觀於洛河沈璧禮畢王退俟至于日旰榮光併出幕河

青雲浮洛青龍臨壇銜元甲之圖吐之而去

原刻脫此十字據文選諸

建平王上書注增

一云榮光出河休氣四塞

榮光卽五色也

嘉禾莖長五尺三十五穗

御覽八十七

周公旦卽攝七年鸞鳳見冀莢生青龍銜甲元龜背書

此中候

攝洛戒文又見後

周公歸政於成王太平制禮鸞鳳見有元龜負

圖出周公援筆以時文寫之

初學記廿一類聚九十九御覽九百十六

周公

攝政七年制禮作樂成王觀於洛沈璧禮畢王退有元龜青

純蒼光背甲刻書上躋于壇赤文成字周公寫之

初學記三十類聚

九十九御覽  
九百三十一

按龜書所言自周公訖於秦漢盛衰之符麒麟遊苑鳳凰翔庭成王援琴而歌曰鳳凰翔兮於紫庭余何德兮以感靈賴先王兮恩澤臻於胥樂兮民以寧

維歲二月侯在東館

鄭元注曰維辭也侯齊桓公館舍

歎曰於戲仲父寡人

聞古霸王封泰山刻石紀號立顯象今寡人名爲何君管子

曰衛困於狄案兵須滅乃存之仁不純爲霸君昔古聖王功

成道洽符瑞出乃封泰山今比目之魚不至鳳凰不臻麒麟

遜未可以封

○初學記十三御覽五百三十六

齊桓公欲封禪謂管仲曰

寡人日暮仲父年艾

○類聚十八御覽三百八十三按此二條並中候準織哲文又見後

按封與禪非一處管子曰昔無懷氏封泰山禪云云處義

封泰山禪云云神農封泰山禪云云炎帝封泰山禪云云  
黃帝封泰山禪云云顓頊封泰山禪云云帝嚳封泰山禪  
云云堯封泰山禪云云舜封泰山禪云云禹封泰山禪會  
稽湯封泰山禪云云周成王封泰山禪社首皆受命然後  
得封禪及至漢武帝登封泰山至於梁父而後禪肅然亦  
封與禪二處

維天降紀秦伯出狩至於咸陽天震大雷有火流下化爲白

雀銜籙丹書集於公車

○初學記一類聚九十  
九御覽九百二十二

自號之王霸姓有工

工項字之側○  
御覽八十七

卯金刀帝出復禹之常

○公羊傳哀十  
四年疏禹作堯

中候握河紀

世紀堯與羣臣沈璧于河乃爲握河紀今中候也告禪  
後二年刻璧爲書沈洛今中候運衡篇也所授之圖書  
今握河紀也

堯卽政七十年仲月甲日至於稷沈璧於河青雲起回風搖

落龍銜馬圖赤文綠色

注龍而形象馬故云馬圖

自河而出臨壇而止吐

甲迴遶甲似龜廣九尺有文言虞夏商周秦漢之事帝乃寫

其文藏之東序

○路史陶唐紀注又餘論六

堯卽政七十年授河圖帝立壇磬折西向禹進迎舜契陪位

稷辨護

辨護者供時用相禮儀也

堯曰嗟朕無德欽奉不圖賜爾二三子

斯封稷契臯陶皆賜姓號

○詩生民疏又商頌譜疏周禮大祝疏又山虞疏

又沈璧

于洛赤光起有靈龜負書出背甲赤文成字止壇

○路史陶唐紀注

堯曰皇道帝德非朕所事

○禮曲禮上疏周禮師氏疏事並作專

### 中候考河命

若稽古帝舜曰重華欽翼皇象

注翼奉象歷也言欽奉皇天之歷數也

舜曰朕

惟不艾蕝莢孚著百獸率舞鳳皇司晨

注如雞司晨○路史有虞紀注

舜至

于下稷榮光休至

稷讀曰側下之側日西之時休美也榮光氣也

黃龍負卷于館圖

○御覽九百廿九館作舒無于字

出水壇畔赤文綠錯

錯分也文而以綠色分其間○此與前中

候文大同

按乾坤鑿度孔子曰天之將降嘉瑞應河水清三日青四

日青變爲赤赤變爲黑黑變爲黃各各三日河中水安井

天乃清明圖乃見見必南向仰天言見三日以三日見六

日以六日見九日以九日見十二日以十二日見十五日

以十五日見皆言其餘日

### 中候摘洛戒

若稽古周公旦欽惟皇天順踐祚卽攝七年鸞鳳見蓂莢生

青龍銜甲元龜背書以上

○詩周頌譜疏  
路史餘論六

周公踐阼理政與天合志萬序咸得休氣充塞藩侯陪位羣

公皆就立如舜周公差應

差應邪錯在後聖  
人在神位故近之

至于日昃榮光

汨河也

汨覆

青雲浮至青龍銜元甲臨壇上濟止圖滯

青龍  
靈威

仰之使元甲  
所以襄圖

周公視三公視

聖人精明  
故先視

其文言周世之事五

百之戒與秦漢事

○路史餘論六注以  
爲孝經援神契文

### 中候雜篇

中候書佚而類書所引中候篇目猥多然章句已不倫



矣遇一語二語輒爲羅之

中候運行

行一作衡

帝堯刻璧命羣臣東沈于雒書曰天子臣放勳德薄施行不

元

元善也○御覽八十

中候洛子命

湯觀於洛沈璧而黑龜與之書黃魚雙躍○

禮檀弓上疏

中候擿洛戒

戒字誤詩疏引作擿維貳

剡者配姬以放賢山崩水潰納小人家伯罔主異載賓

剡指妻

也○

詩十月之交疏

中候義明

祠五九禮闕郵

周禮師氏疏祠作同注同

宋注闕止也郵過也言五帝後祠三王之世其治各九百歲當以禮止過也

### 中候敕省圖

德合五帝坐星者稱帝

○詩譜序疏禮曲禮上疏並以爲郵注敕省圖文

### 中候稷起

蒼耀稷生感迹昌

○詩生民疏

### 中候準讖書

仲父年艾誰將遠政

注七十曰艾○禮曲禮上疏原刻注末有者云誰將遠政六字乃孔疏語孫氏

誤并取之也今刪去

桓公欲封禪管仲曰昔聖王功成道洽符出乃封泰山今比目之魚不至鳳凰不臻麒麟遁未可以封

○禮王

附洪範緯

日行中道移節應期德厚受福重華留之

○後漢書  
郎顗傳

古微書卷五終



古微書卷六

春秋緯

賁居子曰漢末有郎中郗萌集圖緯讖雜占爲五十篇  
於是七經緯各自爲篇部至宋均始合而集之得三十  
卷總名曰春秋災異而言緯者始主春秋諸書徵引殊  
不別疏皆曰春秋緯以故緯之篇春秋爲多至其詮次  
先後茫無辨也梁文思博要春秋緯猶三十卷今惟隋  
志緯目十有三篇曰演孔圖曰元命包曰文耀鉤曰運  
斗樞曰感精符曰合誠圖曰考異郵曰保乾圖曰漢含  
孳曰佐助期曰握誠圖曰潛潭巴曰說題辭是其本序  
中惟元命包流行最贍相傳應最古他文瑑瑑珞珞膏

之不續也茲各拾其部綴以成篇

春秋元命包

元者大也命者理之隱深也包言乎其羅絡也萬象千名靡不括也然主以春秋立元之意爲之履端故其名則然

黃帝受圖立五始元者氣之始春者四時之始王者受命之

始正月者政教之始公卽位者一國之始

○隱元年穀梁傳疏引春秋緯

元年者何元宜爲一謂之元何曰君之始年也

杜預傳注曰凡人君卽位

欲其體元以居正

○文選東都賦注

元者端也氣泉

注云元爲氣之始如水之有泉泉流之原無形以起有形以分窺之不見聽之不聞○隱

元年公羊傳疏引春秋說

春秋以元之深正天之端以天之端正王者之政也王不上  
奉天文以立號則道術無原故先陳春後言王天不深正其  
元則不能成其化故先起元然後陳春矣○隱元年公羊傳疏引春秋說  
按春秋繁露說唯聖人能屬萬物於一而繫之元也是以  
春秋變一謂之元元猶原也其義以隨天地終始也故元  
者爲萬物之本而人之元在焉安在之乃在乎天地之前  
故人雖生天氣及奉天氣者不得與天元本天元命而共  
違其所爲也故春正月者承天地之所爲也繼天之所爲  
而終之也此義足相發明

律之爲言率也所以率氣令達也

率猶導也

歲之爲言遂也三年

一閏以起紀也

遂出也出行事於所直辰也○御覽十六又十七

冬至百八十日

春夏成夏至百八十日秋冬成合三百六十日歲數舉數猶備也

○書鈔百五十三陽氣數成于三故時三月陽數極于九故三月一

時九十日○朱衷曰四時皆象此類不惟春也○文選咏懷詩注又策秀才文注

春者神明推移精華結紐神明猶陰陽也相推相移使物精華結成紐要也春含名

蠶位東方動春氣明達六合俱生萬物應節五行並起各以

名利其精青龍龍之言萌也陰中之陽也○御覽十九

正朔三而改文質再而復○類聚廿二文選答賓戲注又晉武帝革命論注三王有

失故立三教以相變夏人之立教以忠其失野故救野莫若

敬殷人之立教以敬其失鬼故救鬼莫若文周人之立教以

文其失蕩故救蕩莫若忠如此循環周則復始窮則相承○禮

表記



按何休公羊說夏以斗建寅之月爲正平旦爲朔法物見色尙黑殷以斗建丑之月爲正雞鳴爲朔法物牙色尙白周以斗建子之月爲正夜半爲朔法物萌色尙赤

天道煌煌非一帝之功王者赫赫非一家之常順命者存逆

命者亡

○初學記九

皇者煌煌也道爛然顯明帝者諦也王者往也神之所輪向人所樂歸也

○文選西京賦注初學記九制覽七十六

後漢白馬令李雲所說帝者諦也以此觸罪

文王造之而未遂武王遂之而未成周公旦總少主而成之

故曰成王

○類聚十一總作抱

聖人一其德智者循其轍長生久視

一其德言盡得其帝之壽也其轍言不違

其帝所尚也如是則皆得不以命制則愚者悖慢智者無所

長生久視言所行當天也施其術殘物逆道天不殺故立三命以垂策所以尊天一節

三者法三道之術不以命制愚慢之人則賢人道術不得施行勢相反命者天之令也

所受於帝行正不過得壽命壽命正命也起九九八十一帝

帝也八十一陽有隨命隨命者隨行爲命也援神契曰隨者

氣相乘之極有遭命遭命者行正不誤逢世殘賊君上逆亂

行則隨其累棄咎下流災譴並發陰陽散忤暴氣雷至滅日動地絕人命

沙鹿襲邑是忤錯也襲猶淪也河水淪沙鹿之邑溺殺人也○御覽三百六十

按春秋繁露說人始生有大命是其體也有變命存其間

者其政也政不齊則有忿怒之志若將施危難之中而時

有隨遭者神明之所接絕屬之符也亦有變其閒使之不

齊如此不可不省之

神農生三辰而能言五日而能行七朝而齒具三歲而知稼

穡般戲之事

○語見路史炎帝紀

黃帝龍顏得天庭陽上法中宿取象文昌戴天履陰秉數制

剛

○御覽

顓頊駢幹上法月參康度成紀以理陰陽

駢猶重也永精

主月參伐主斬刈成功兼此月職重助貴以爲表○御覽三百七十一

帝嚳戴干是謂清明發

節移度蓋象招搖

干楯也招搖爲天文戈楯相副戴之像見天中以爲表○御覽八十又三百五十七

堯眉八彩是謂通明歷象日月璇璣玉衡

○類聚十一舜重

童子是謂元景

一作承原一作慈原又作滋涼宋注云有滋液之潤且清涼光明而多見也

上應

攝提以象三光

○初學記九御覽八十又三百六十六

后稷岐頤自求是謂好

農蓋象角亢載土食穀

宋注曰頤有土象頤面爲下部下部爲地乃地利也○御覽三百六十八

湯臂三肘是謂神剛象月推移以綏四方

○類聚十二御覽八十三又三百六

九文王四乳是謂含良蓋法酒旗布恩舒明

酒者乳也能乳天下布恩之謂

也○初學記九類聚十

二御覽三百七十一

文王龍顏柔肩望羊

柔肩言象龍肩曲起

齟齬是謂剛強逐命誅害以順天討

○御覽八十四

一曰取象參房

誅害以從天心

注曰房爲明堂主布政參爲大辰主斬殺兼此二者故重齒爲表○御覽三百六十八

賁居子曰帝王之相亦有不奇而奇者如周靈王生

而有髭是謂髭王劉聰虜耳亦生而眉白左耳毫長至

二尺其父淵當心有赤毫三根長三尺六寸此何解也

漢高帝左股七十二黑子而宇文泰亦背有黑子宛轉

若龍盤梁武帝有文在右手曰武隋文帝有文在左手

曰王苻堅何人背有赤文隱起成字曰艸付臣又土然

則天之篤生亦安問夷夏哉瑞氣之所偶值因而謂之  
英雄其實徐偃王之有筋無骨李克用之獨眼宋太祖  
之正黑色未始非英雄也

少典妃安登游於華陽有神龍首感之於常羊生神子人面

龍顏好耕是爲神農

○路史炎帝紀注

又女登生神農人面龍顏始

爲天子

○御覽百三十五

黃帝時大星如虹下流華渚女節夢接意感生白帝朱宣

朱宣

少昊氏○文選辨命論注書鈔二十三

神農世怪義

○路史炎帝紀注引作炎帝之臣曰怪義

生白阜圖地形脈道

怪義白阜

之母名也白阜爲神農圖畫地形通水脈之道使不壅塞也○御覽三十六

按神農有子曰柱七歲而佐神農以名百藥種百穀豈卽

# 白阜耶

堯爲天子季秋下旬夢白帝遺吾馬喙子其母曰扶始升高

邱睹白帝上有雲虎

有雲狀如虎也

感已生皐陶堯索扶始問之如

堯言徵與語明於刑法罪次終始故立皐陶爲大理

○句學記十二

類聚九十九書鈔百五十七御覽廿四又五十三又三百九十七

姜嫄游閼宮其地扶桑履大人跡而生稷

○類聚八十八御覽百三十五又九

百五十五路史高辛紀注

一本周先姜原履大人跡於扶桑生后稷推種

生故稷好農

○御覽八

又云蒼神精感姜嫄而生卦之得震

故周蒼代商

○蒼神謂佶木王者也路史高辛紀注

代殷者爲姬昌

○姬昌之言基始也昌兩日重見言明象

生於岐立於豐精翼日

爲日精所羽翼故遂以爲名也

衣青光

○木神以其方色表衣

遷造西十刻消

○遷造西蓋文王爲西

伯時方造意東入討紂十刻之間卽消滅  
之言聖人所向無前也○御覽八十四

姬昌蒼帝之精

位在房心

記九初學

殷紂之時五星聚於房房者蒼神之精

周據而興

○類聚十御覽五文選始出尙書省詩注又褚淵碑注又安陸昭王碑注

一本文王之

時五星以聚房也

○周禮大宗伯疏

堯遊河渚赤龍負圖以出圖赤如綈狀龍沒圖在

○文選石闕銘注

有鳳銜書遊文王之都故武王受鳳書之紀

○詩文選類聚九十九

成王時西方獻孔雀

按此篇言瑞應事視諸緯爲略惟堯之子有一皐陶而不

以爲嗣比於神農之生白皐惜其不傳也故爲存之

王者不空作樂

○內鄉人外邦國咸歌之

樂者和盈於內動發於外應其

發時制禮作樂以成之是故作樂者必反天下之始樂於已

爲本舜之時民樂其紹堯業故樂名韶韶者紹也

舜服繼堯之業

禹

之時民大樂其駢三聖相繼故樂名夏夏者大也

駢讀曰頻頻猶並也

湯之時民大樂其救之於患害故樂名大濩濩者救也武王

之時民樂其興師征伐故樂名武武者伐也四者天下所同

樂一也其所同樂之端不可一也

各樂其君所爲故不可合四家以爲一也○類聚十

一又十二御覽八十二又八十三又五百六十六

周爵五等法五精春秋三等象三光公之爲言平也公平正

直侯者候也候王順逆伯之爲言白也明白於德也子者奉

恩宣德勇者任功立業

○禮王制

王者封國上應列宿之位

若角亢爲鄭房小爲宋之比

其餘小國中星辰者以爲附庸

○禮王制疏周禮大

司徒疏

公之言公公正無私侯之言候候逆順兼同候王命



矣伯之言白明白于德子者孳恩宣德勇者任功立業皆上

奉王者之政教禮法統理一國修身絜行矣

○隱元年公羊傳疏

陽

成於三列於七三七十二一故每州二百一十國也

○禮王制疏

三者置廷尉讞疑刑者官之平下之信也尉者尉民心撫其

實也安立字士垂一人詰屈折著爲廷示戴尸首以寸者爲

言寸度治法數之分示惟尸稽於寸舍則法有分故爲尉示

與尸寸

宋均注曰士事也垂係也尸人死也人死不可無乃戴之者示天下不可無死也○說郛

斧鑕主亂行斬狂詐斧之爲言補也

○御覽七百六十三補作捕

人君樹棘槐聽訟於其下棘赤心有刺言治人情者原其心

不失赤實棘所以刺人令其情各歸實槐之言歸也情見歸

實也

○初學記二十御覽六百二十九又九百五十四

墨劓辟之屬各千臙辟之屬五百宮辟之屬三百大辟之屬

二百列爲五刑罪次三千

襄二十九年公羊傳疏

五氣之精交聚相加以迎陽氣道人致和

五氣五行之氣

陰陽之性

以一起人副天道故生一子

御覽二百六十一

仁者情志好生愛人故其爲人以仁其立字二人爲仁

專於已念施與也  
御覽三百六十一

頭者神所居上員象天氣之府也歲必十二故人頭長一尺

二寸

類聚十七御覽三百六十三

在天爲文昌在人爲顏頤太一之謂也

顏之言氣畔也陽立於五故顏博五寸

御覽三百六十四

天有攝提

人有兩眉爲人表候陽立於二故眉長二寸

注云攝提兩星頰曲人眉似之

舌之爲言達也陽立於三故舌在口中者長三寸象斗

玉衡陰合有四故舌淪入咽內者長四寸

朱注曰玉衡三星也魁四星也○御覽

覽三百六十七唇者齒之垣所以扶神設端若有列星與外有限故

曰唇亡齒寒

○御覽三百六十八

目者肝之使肝者木之精蒼龍之位也鼻者肺之使肺者金之精制割立斷耳者心之候心者火之精上爲張星火成於五故人心長五寸陰者腎之寫腎者水之精上爲虛危口者脾之門脾者土之精上爲北斗主變化者也

○白虎通脾情性篇

之爲言附著也如龍蟠虎伏合附者也

○御覽三百六十九

脾者門之府主稟氣胃者穀之委故脾稟氣也膀胱者肺之

府也肺者斷決膀胱亦常張有勢故膀胱決難也

○御覽三百七十六

髮精散爲鬢

○御覽三百七十四

腦之爲言在也人精在腦膏者神

之液也

御覽三百七十五

掌圓者法天以運動指五者法五行

御覽三百七十一

陽立於三故

人脊小而結陰極于八故人旁八幹長八寸齊者下流並

會合爲齊腹

齊中也四方並湊者也

腰而上者爲天尊高陽之狀腰而

下者爲地豐厚陰之象數合於四故腰周四尺

御覽三百七十一髀

之爲言肢也陰二故人兩髀

御覽三百七十二

按道藏五符經天生萬物人爲貴也人生包含天地無所

不法立天子置三公九卿二十七大夫八十一元士九州

百二十郡千二百縣也膽爲天子大道君脾爲王后心爲

太尉左腎爲司徒右腎爲司空封八神及臍爲九卿珠樓

神十二胃神十二三焦神三合爲二十七大夫四肢神爲

八十一元士合之百二十以法郡數也又肺爲尙書府肝爲蘭臺府

又素問靈蘭篇心者君主之官也神明出焉肺者相傳之官治節出焉肝者將軍之官謀慮出焉膽者中正之官決斷出焉膈中者臣使之官喜樂出焉脾胃者倉廩之官五味出焉大腸者傳道之官變化出焉小腸者受盛之官化物出焉腎者作強之官伎巧出焉三焦者決瀆之官水道出焉膀胱者州都之官津液藏焉氣化則能出矣凡此十二官者不得相失也夫等之爲形體耳緯書則以律天象而道藏醫經則以擬之朝廷列之官爵詎不貴哉其莫知惜也

自開闢至獲麟二百七十六萬歲

續漢書  
律歷志

古微書卷七

春秋元命包

天人同度正法相受天垂文象人行其事謂之教教之爲言效也上爲下效道之始也

○御覽三百六十又五百九十三

天不足西北陽極於九故周天九九八十一萬里

○類聚一御覽一

按關令內傳天地南午北子相去九千萬里東卯西西亦九千萬里四隅空相去九千萬里而鄒衍云九州之外如赤縣神州者九又淮南子亦云天之九野凡九千九百九十九隅則九九之說不爲無稽惜大章豎亥足跡猶淺略耳

地不足東南故陰右動終而入靈門

右動動而東也靈門已也陰藏於已也○御覽

三十  
六

地所以右轉者氣濁精少含陰而起遲故轉右迎天佐其道

地生於離既而不敢當陽動退居少陰則亦宜右地者易也

言養物懷任交易變化含吐應節故其立字土力於乙者爲

地地加土以力又加乙者言奉太土無位而道在故太乙

不興○白虎通五行篇引作與化人主不任部職地出雲起雨以合從天

下勤勞出於地功名歸於天土以謙自正以卑自斂終不自伐生養之苦乃興雲下雨以爲

功一歸于天也  
○御覽三十六

陽數起於一成於三故日中有三足鳥○御覽三文選蜀都賦注又七命注

日中有三足鳥者陽精其僂呼也僂呼溫潤生長之言○初學記三十御覽九百二十

日之爲言實也○禮月令疏月之爲言闕也兩設以蟾蜍與



兔者陰陽雙居明陽之制陰陰之倚陽

○初學記一御覽四文選吳都賦注又月

注賦

七政度日月明

○御覽三

一歲三百六十五日四分度之一言陽布散立數合一故立

字四合其一

○御覽三

日左行周天二十三萬里

○御覽三

日圓望之廣尺以應千里

○周禮大司徒疏禮王制疏

日尊故滿滿故

明明故精在外日滿者常盛無虧也

鄭注云凡日景於地千里而差一寸異千里而

同一寸也○書鈔百四十九

太陰水精爲月日行十三度常朏任而受

明受陽精也陽精在內故金水內景

○書鈔百五十一御覽四

按黃氣陽精經日陽之精德之長也縱廣二千三十里金

物水精暈於內，琉光照於外。其中有城郭，人民月暉之圍，縱橫二千九百里。曰：銀琉璃水精映其內，城郭人民與日宮同。

大戴記曾子曰：參聞之。夫子天道曰圓，地道曰方，方曰幽，而圓曰明明者，吐氣者也。是故外景幽者含氣者也。是故內景故火曰外景，而金水內景吐氣者，施而含氣者，化是以陽施而陰化也。

陰陽聚而爲雲，陰陽和而爲雨，陰陽凝而爲雪，陰陽合而爲

雷，陰陽激而爲電。

御覽八又十三陰陽交而爲虹霓，離爲背。

倏分爲抱珥。

續漢書五行志注陰陽怒而爲風，亂而爲霧，霧陰

陽之氣也。

御覽九又十五

陰陽凝而爲霜，陰陽散而爲露，露下潤。

其草木也

○編珠天地御覽十二又十四○  
原刻脫此三句依單行本補入

霜以殺木露以

潤草

○初學記二書  
鈔百五十二

又大戴天圓篇陰陽之氣各靜其所則靜矣偏則風俱則  
雷交則電亂則霧和則雨陽氣勝則散爲雨露陰氣勝則  
凝爲霜雪陽之氣專爲暄陰之氣專爲霰霰雹者一氣之  
化也

土之爲言吐也子成父道吐氣精以輔也陽立於三故成土  
其立字十從一爲土

○御覽  
三十七

水之爲言演也陰化淖濡流施潛行也故其立字兩人交一  
以中出者爲水一者數之始兩人譬男女言陰陽交物以一

起也

○御覽  
五十八

火之爲言委隨也故其立字人散二者爲火也

○初學記廿五御覽八百

六十

木者陽精生於陰故水者木之母也木之爲言觸也氣動躍

也其字八推十爲木八者陰合十者陽數

○御覽九百五十二

山者氣之苞所以含精藏雲故觸石而出

○類聚七御覽三十八

水者天地之包幕五行之始焉萬物之所由生元氣之津液

也

○水經河水注初學記六

中女爲江湖江潮者所以開神運化故其氣適急

○類聚八御覽六十

太微爲天庭五帝以合明

○此句又見下文重出

紫微宮爲大帝

○諸書

所引校之此句當在太微爲天庭之上

中有五帝座五帝合明

○周禮大宗伯疏禮月令疏僖

三十一年

天生大列爲中宮太極三星其一明者太一當

居旁兩星巨辰子位故爲北辰以起節度亦爲紫微宮

宋均

十二宮中外位各定總謂之紫宮

紫之言此也宮之言中也言天神圖法陰

以爲

陽開閉皆在此中也

○周禮大宗伯疏文選西都賦注天官書索隱

又宮之爲言宣

也宣氣立精爲神垣也

○史記天官書索隱

按淮南子太微者太一之庭也紫宮者太一之居也軒轅者帝妃之舍也咸池者水魚之囿也天阿者羣神之闕也四宮者所以爲司賞罰太微者主朱雀紫宮執斗而左旋日行一度以周於天

昂畢間爲天街散爲冀州分爲趙國立爲常山其下有祠有安天王牽牛流爲揚州分爲越國立爲揚山軫星散爲荊州分爲楚國荆之爲言強也陽盛物堅其氣急悍也虛危之精

流爲青州分爲齊國立爲萊山天弓星主司弓弩流爲徐州  
別爲魯國徐之爲言舒也言陰收內安詳也五星流爲兗州  
兗之爲言端也言隄精端故其氣纖殺分爲鄭國鉤鈐星別  
爲豫州豫之爲言序也言陰陽分布各得處也東井鬼星散  
爲雍州分爲秦國東距穀阪西有漢中南含高山北阻居庸  
得東井動升之萌其氣險也觜參流爲益州益之爲言隘也  
謂物類並決其氣急切決烈矣箕星散爲幽州分爲燕國幽  
之爲言窈也言風出入窈冥敏勁易曉故其氣躁急營室流  
爲并州分爲衛國之鎮立爲明山井之爲言誠也精含交并  
其氣勇抗誠信也

○類聚六

又云五星流爲兗鉤鈐星別爲豫昂

畢星散爲冀箕星散爲幽營室流爲并參伐流爲益虛危流

爲青天氏流爲徐軫星散爲荆牽牛流爲揚

○晉書地理志

按淮南子星部地名角亢鄭氏房心宋尾箕燕斗牽牛越須女吳虛危齊營室東壁魏奎婁魯胃昂畢韓觜嚙參趙東井輿鬼秦柳七星張周翼軫楚及讀史記天官書又與小異其文曰角亢氏兗州房心豫州尾箕幽州斗江湖牽牛婺女揚州虛危青州營室至東壁并州奎婁胃徐州昂畢冀州觜嚙參益州東井輿鬼雍州柳七星張三河翼軫荆州此或古天文家所傳之異也

前漢志所載占法則又云秦之疆候太白占狼弧吳楚之疆候熒惑占鳥衡燕齊之疆候辰星占虛危宋鄭之疆候歲星占房心晉之疆亦候辰星占參伐自河山以南者中

國爲陽陽則日歲星熒惑填星占於街南畢主之其西北則胡貉月氏旃裘引弓之民爲陰陰則月太白辰星占於街北昴主之然太白金中國而辰星出入趨疾常主夷狄其大經也併錄於此以備參互

紫宮之垣上將建威武次將正左右貴相理文緒司祿賞功進士司命主災咎司中主佐理也

○史記天官書索隱無紫宮之垣四字

北者高也極者藏也言太一之星高居深藏故名北極

○昭十七

年公羊傳疏引春秋說

立三台以爲三公北斗九星爲九卿二十七大夫內宿部衛之列八十一紀以爲元士凡百二十官焉下應十二子

○桓八年

公羊傳疏引春秋說



玉衡北兩星爲玉繩玉之爲言溝刻也瑕而不掩折而不傷

宋均曰繩能直物故名玉繩溝謂作器  
御覽五文選西京賦注又七命注

魁下六星兩兩而比曰三台主閭德宣符德立題宋均曰皆升文昌三

台也立題題五帝之德行主其職矣能之爲言耐也天官器人各以其材因而

任之則分職治其象以見符能今之台字也耐今之三台

星色齊君臣和不齊大乖御覽五天一上星爲大將類聚

御覽二百七十二天尉主甲卒設武備今時尉官准此義爲獄

圓者象斗還合注曰作獄圓者象斗之運也

以上皆紫宮星

左角理物以起右角將率而動故曰左角理右角將此入字孫氏

增以意攝提之爲言提攜也言能提斗攜角以接於下也史記天

官書

索隱

亢四星爲廟廷

○史記天官書索隱

房有鉤鈴兩星以閉防神府闔舒爲主鉤距以備非常也○史

記天官書索隱

心三星五度有天子明堂布政之宮

○御覽五昭七年公羊疏

兩口

銜士爲喜喜得明心喜者爲憲憲天心

宋均曰心爲天王布政之宮萬物頌之乃

成所以爲喜也今于口閒士移一畫之者於字體安也是爲兩口士也喜得明明得所喜也○御覽四百六十七

尾九星箕四星爲後宮之場列爲南宮其庭太微

○御覽五史記天官

書索隱

織女之爲言神女也成衣立紀故齊能成文繡應天道○女工

齊能神天下故懸以衣人得此氣○初學記二十七

織女主瓜果

○御覽九百六十四

按織女三星近牛宿

須女四星十二度主布帛

○御覽八  
百十八

危東六星兩兩而比曰司空主水金木守之天下憂水

○類聚四

十七御覽  
二百八

營室十星垣陶精類始立紀綱包物爲室

○史記天官書索隱

奎十二星十六度主武庫之兵

○書鈔  
百十三

漢中四星曰騎一曰天駟旁一星王良主天馬也

○原刻脫此二句依

單行本補入○史記天官書索隱文選思元賦注

帝位明即畢星光大也

○御覽八  
百七十二

昂畢間爲天街日月五

星出入熒惑守之而不通天下危

○御覽八  
百七十五

卷舌主口語

熒惑臨之下多亂謀國君以口舌之害寇起

○御覽八  
百七十五

咸池主五穀其星五者各有其職以精委爲穀也

宋均曰穀有五故五

星主

咸池之爲言皆多也言穀生於子水含秀懷實至秋精

垂故一名五車以載歸之爲言扶而化之

御覽三十五

天潢主河渠所以度天神通八方

宋注天潢天津也津湊也主計度也○史記天官書

索隱

按卷舌咸池天潢皆近畢宿

古司怪主卜

司怪星名近黃星○初學記二十

離位有九星句曲一處一爲天旗司五星之處日月之過熒

惑守之日食星墜天下亂

注曰天旗參旗也參旗色明於常則日月五星亦變爲色應之若熒

惑守之不寤則將有日食星墜爲篡弑之先徵○書鈔百二十

夫弓矢之張候變禦難用戒不虞矢附於天星四射

注四射四方之

射也。○書鈔百二十五

直弧北有一大星爲老人星治平則見見則

主壽亡則君危主亡常以秋分候之南郊○類聚一御覽五又八百七十二

按弧矢星近井宿

東井八星主水衡

○史記天官書索隱

天狗主守財

○近鬼宿○後漢書馬融傳注書鈔百五十

酒旗星主上尊酒所以侑神也

○書鈔百四十八

酒者乳也王者法

酒旗以布政施天乳以哺人

按酒旗星近柳宿

熒惑守軒轅貴妾爭熒惑守營室羣妃鬪

○御覽八百七十五

按軒轅星近星宿

翼星主南宮之羽儀文物聲名之所豐茂爲樂庫爲天倡先

王以賓于四門而列天庭之衛主俳倡近太微而爲尊

○御覽五

百六十九書  
鈔百十二

蟾蜍陰精流生織女立地侯

宋均注曰地侯鎮星別名也○御覽五

北方辰星水生布其紀故辰星理四時

宋均曰辰星正四時之位得與北辰

同名也○史記  
天官書索隱

古巫咸甘石三家星經所傳猶存而緯候談星殊名異說

至如二十八宿夷夏所同仰也道釋二部則各載其姓氏

衣佩宮室觀雲笈七籤所疏織女能致神芝傳舍星旦爲

馬晝爲鹿暮爲獐天市星能致明月珠旦爲木晝爲兔暮

爲貉平門星能致神女倡樂旦爲生木晝爲豕暮爲蜺蜃

穀土星能致飛鳥來朱雀旦爲雞晝爲鳥暮爲鳶積水星

能致四方萬物恣其所欲坐在立亡狼星能致天帝君百  
二十神文昌星能致山內果實旦爲猿晝爲猴暮爲死石  
五車星能致甘露麒麟三台星旦爲龍晝爲蛇暮爲魚軒  
轅星天之后妃其神旦爲羊晝爲蟹暮爲蟹殆又卽二十  
八禽而衍其說者精氣幻化倘有是乎要不可執一而准  
日月出內道璇璣得常天地崇靈聖王相功○北史袁充傳  
隋書天文志  
三年閏不告朔非禮也夫閏正時以作事厚民生之道樞機  
在是○書鈔  
歲時

麟龍鬪日月薄食

○初學  
記一

猛虎獻谷風起類相動也

○文選蜀

都賦注  
獻賦生

龍之言萌也陰中之陽也故言龍舉而雲興

○初學記三十  
御覽九百廿九

火流爲烏鳥孝鳥陽精天意烏在日中從天以昭孝也

○類聚九

十二御覽九百二十

火離爲鸞鳳爲孔雀

○御覽九百十五又九百十六又九百二十四

君失德則地吐泉魚銜兔

兔陰精魚是陽見制也○御覽九百七

槐木者靈星之精

○類聚八十八御覽九百五十四引春秋說

人君樹槐聽訟其

下○文選策秀才文注按此二句已見前卷重出

古微書卷七終



古微書卷八

春秋演孔圖

此帝爲血書鳥圖而述也故以演孔立名而旁及帝王

正氣爲帝間氣爲臣宮商爲姓

○後漢書郎顗傳注引作佐

秀氣爲人

○類

聚十一御覽七十六又三百六十又六百二十一

天子皆五氣之精寶各有題序以次運相據起必有神靈符

紀諸神扶助使開階立遂是以王者常置圖籙坐旁以自正

也

遂當作隧遂道也○初學記九御覽七十六

蒼頡四目是謂並明顓帝戴干是謂崇仁帝佶戴干是謂清

明堯眉八采是謂通明舜目重童是謂元景禹耳參漏是謂

大通湯臂三肘是謂卿翼文王四乳是謂合良武王齒齒是

謂剛強

○路史史皇紀注

按荀子帝堯長帝舜短文王長周公短仲尼長子弓短又  
仲尼面如蒙俱周公身如斷甯皐陶身如削瓜閔天面無  
見膚傳說身如植鰭伊尹面無須麋禹跳湯偏堯舜參牟  
子然桀紂長巨姣美而爲天下大僂是非容貌之患也莊  
子亦云闔跂支離無脤說衛靈公靈公悅之而視全人其  
脰肩肩甕盎大癭說齊桓公桓公悅之而視全人其脰肩  
肩故德有所長而形有所忘後人慕古而過神其說則以  
爲聖人之有奇表耳其實形貌安足異于人烏知千歲之  
下而有傳陽虎其狀者不以爲眞夫子也

黃帝將興黃雲升於堂上文命之候元龍御雲天命於湯白

雲入房

注白雲金精。類聚一御覽八百七十二

一曰天命之見候期門靈龜

穴庭元龍御雲

注靈龜虛虎也。穴庭者星入太微門元龍水精也。御雲者蓋召氣也。御覽八十二路史

夏后紀注

一曰天命湯白虎戲朝其終白虎在野。御覽八一

本湯地七十內懷聖明白虎戲朝

類聚九十九

又曰夏民不康天

果命湯白虎戲朝白雲入房

御覽八十三

黑精用事百木共根

百枝木共一根。天下共一主之徵也。御覽九百五十二以爲運斗樞文

黑帝治生五角之禽以觸民

注曰陽數五也。御覽九百十四

聖人在後曰望陽苞懷至德據少陽

文王子也。故曰在後。御覽百四十

六有人叩金豐擊玉鼓駕六龍

鼓喻所行清嚴人服其威勢也。初學記十六御覽

五百八

其人曰角龍顏姓卯金刀含仁義

卯金刀名爲劉

州故爲漢分也。類聚十二御覽八十七

戴玉英

玉英文帝之首表象玉英而秀出

光中再

光也再再中也漢含章曰

仁雄出日月角

爲仁人之雄傑旣戴玉英且日角也

謂明於天下○御覽八十八正文月角作角用注明字亦作用

按光中再者卽本方士新垣平日卻復中之誑而附以其說故知緯書多雜于漢儒不盡孔門

孔子母顏氏徵在遊大澤之陂睡夢黑帝使請己已往夢交語曰女乳必於空桑之中覺則若感生邱於空桑首類尼邱

山故名

○類聚八十八御覽三百六十一又九百五十五

孔胄文曰制作定世符

○御覽三百七十一

孔子長十尺大九圍坐如蹲龍立如牽牛就之如昂望之若

斗

○御覽三百七十七又三百九十三

按古家語云叔梁紇年餘七十無妻顏父有三女顏父謂

其三女曰耶大夫身長七尺武力絕倫年餘七十誰能與之爲妻二女莫對徵在進曰從父所制將何問焉父曰卽爾能矣遂以妻之爲妻而生孔子三歲而叔梁紇卒近本家語本姓解叔梁紇其妾生孟皮字伯尼求婚顏氏禱尼邱山而生孔子十九娶于宋之并官氏生伯魚是叔梁紇故有妻而孔子故有兄也神孔子之生者則又過奇伏候古今注云孔子生之夜有二蒼龍自天而下有二神女擎香霧於空中以沐徵在先是有五老列於庭則五星之精有麟吐玉書於闕里人家云水精之子繼商周而素王出故蒼龍繞室五星降庭徵在知其爲異拾遺記所志亦同唯云蒼龍附徵在之旁因夢而生夫子天帝下奏鈞天之

樂列於顏氏之房空中有聲言天感生聖子故降以和樂  
笙鏞之音異於俗世也恐或出好奇之口未敢爲信

得麟之后天下血書魯端門曰趨作法孔聖沒周姬亡彗東

出秦政起胡破術書記散孔不絕子夏明日往視之血書飛

爲赤烏化爲白書署曰演孔圖中有作圖制法之狀

○哀十四年公

羊傳注類聚九十八

又曰孔子論經有鳥化爲書孔子奉以告天赤

爵集書上化爲黃玉刻曰孔提命作應法爲赤制

○水經泗水注類聚

九十又九十九御覽九百十四又九百二十二

何休注獲麟亦同又曰孔子仰推天命俯察時變却觀未

來豫解無窮知漢當繼大亂之後故作撥亂之法以授之

則幾於誣聖矣

孔子曰丘作春秋天授演孔圖中有大玉刻一版曰璇璣一

低一昂是七期驗敗毀滅之徵也

○御覽六百六

孔子曰丘援律吹命陰得羽之宮

○御覽十六路史黃帝紀注

孔子作法五經運之天地稽之圖象質之三王施之四海

○初

學記二十一御覽六百八又六百十

詩含五際六情宋均注六情卽六義也一曰風二曰賦三曰

比四曰興五曰雅六曰頌

○初學記二十一御覽六百九

仁義之道日月循環

○類聚一

驅除名政顛倒吾衣裳坐吾曲牀濫長九州滅六王至於沙

邱亡

○御覽六百九十六

按秦世有謠曰秦始皇何彊梁開吾戶據吾牀飲吾酒唾

吾漿餐吾飮以爲糧張吾弓射東牆前至沙邱當滅亡始  
皇旣坑儒焚典乃發孔子墓欲取諸經傳墳旣敗於是悉  
如謠者之言又言謠文刊在冢壁政甚惡之乃遠沙邱而  
循別路見一羣小兒輦沙爲阜問云沙邱從此得病

孟子生時其母夢神人乘雲自泰山來將止於嶧母凝視久  
之忽片雲墜而寤時閭巷皆見有五色雲覆孟子之居焉

○語

見拾遺記及  
宋書符瑞志

按玉鈐經人始受生值賢宿則賢值貴宿則貴故知聖賢  
之生皆不偶也相傳云微子感牽牛星顏淵感中台老子  
感火星張良感弧星樊噲感狼星子路感雷精而生又如  
傳說之死騎箕尾而上爲列星張華旣歿而中台一星爲



之閉則孟子泰山氣象降神而下固有由然

紫極宮內諸侯爲外蕃三公爲中輔

○書鈔五十無紫極宮內四字

王者德政海內富昌則鎮星入闕

○闕華闕之門當帝坐御覽八百七十二

天子舉賢則景星放於天

○御覽八百七十二

天子官守以賢舉則鸞在野

○類聚九十九御覽九百十六

鳳火之精也

○初學記三十

麟木之精也蒼之滅也麟不榮也

宋均曰麟水精生木故曰陰木氣好土土黃木青故

麟色青黃不榮謂見純也○初學記廿九御覽八百八十九

麒麟鬬日無光

宋均曰麒麟少陽之精鬬于地則日弓亦將爭於上○御覽八百八十九

海精死彗星出

海精鯨魚彗星出則國樞樞○御覽八百七十五

八政不中則天雨刀

○御覽八百七十五

又曰則人無唇

人恃唇乃語命無陰不制

○御覽三則鐵飛○御覽八百六十八

霓者斗之亂精也斗失度則投霓見態主惑於毀譽天子外

苦兵威內奪臣無忠則天投霓○後漢書楊賜傳注續漢書五行志

蟾蜍月精也○御覽四

春秋合誠圖

此主赤龍一圖因而立名明夫天人之合皆有誠通而其象已先著於圖則龜馬之書皆不誤也故其述赤帝爲多

伏羲龍身牛首渠肩達掖山準日角歲目珠衡駿毫翁鬣龍

唇龜齒長九尺有一寸望之廣視之專○廣博物志路史太昊紀

赤帝之爲人視之豐長八尺七寸○初學記九路史陶唐紀注豐下兌上

龍顏曰角八采三眸鳥庭荷勝琦表射出握嘉履翌竅息洞

通

○語見路史陶唐紀

蒼帝之爲人望之廣視之專而長九尺一寸

○初學記九

黃帝冠黃文白帝冠白文黑帝冠黑文

○初學記二十六

據宋均感精符注則赤帝爲堯黃帝爲舜白帝爲禹黑帝爲湯蒼帝爲文王此不備錄者識圖之失傳也所云冠黃文等皆圖所預載故諗其奇昔漢祖斬蛇時有嫗旁哭曰吾兒白帝子爲赤帝子所殺此五帝感生之所起乎譏此圖者附而益熾

黃帝德冠帝位

○文選典引注

赤帝之精生於翼

○初學記九

黃帝坐元扈洛水上與大司馬容光等臨觀鳳皇銜圖置黃

帝前帝再拜受圖

宋均注元扈石室名○初學記三十類聚九十九御覽九百十五

黃帝遊

元扈上洛與大司馬容光左右輔周昌等百二十人臨之有

鳳銜圖以置帝前圖以黃玉爲柙

○御覽四十三路史黃帝紀注

堯坐舟中與太尉舜臨觀鳳皇負圖授堯圖以赤玉爲柙長

三尺廣八寸黃金檢白玉繩封以兩端其章曰天赤帝符璽

五字

○初學記三十御覽二百七又九百十五路史餘論七

又赤龍負圖以出河見堯

與太尉舜等百二十臣集發藏之大麓

○此文又見運斗樞篇

上古之圖籙亦何數數也不直有畫且有字有語如述

異志所載陶唐之世越裳國獻千歲神龜方三尺餘背

上有文科斗書記開闢已來帝命錄之謂之龜歷此科

斗書跡皆從何來倘亦理之不可詰也

大帝之精起三河之州中土之腴

御覽七十六

堯母慶都有名於世蓋大帝之女生於斗維之野常在三河之東南天大雷電有血流潤大石之中生慶都長大形像大帝常有黃雲覆蓋之夢食不饑

夢一作茂注云天地以氣食

及年二十寄

跡伊長孺家無夫出觀三河之首常若有神隨之者有赤龍負圖出慶都讀之云赤受天運下有圖人衣赤光面八彩髮髮長七尺二寸銳上豐下足履翌宿署曰赤帝起成天下寶

一本作實

奄然陰風四合赤龍與慶都婚有娠龍消不見既乳視

堯如圖表及堯有知慶都以圖予堯

初學記十額聚九十八御覽五十五又八十

又百三十五

賁居子曰履帝武敏歆如有人道說已怪矣至謂赤龍

與慶都婚而有娠又徵在夢黑帝請與已交不太誕乎  
然小說家有云唐肅宗爲太子時吳皇后之初侍寢厭  
久不寤呻吟氣不屬手掩其左脇曰夢中有神人長丈  
餘介甲操劍曰帝命吾與汝爲子自左脇劍決而入痛  
不可忍肅宗檢之於燭下則若有縫而赤者存焉遽以  
狀聞果生代宗據是則赤龍來婚之說亦或不誤也又  
釋家說中有投胎若男子於母起愛想當亦如是但其  
說圖人衣冠鬚眉皆見則似屬元裔難以臆占

大帝冠五彩衣青衣黑下裳抱日月日在上月在下黃色正

方居中聞名曰五光

御覽七十六

五光垂彩天下大嘉

御覽八十七

天皇大帝北辰星也含元秉陽舒精吐光居紫宮中制馭四

方冠有五采

初學記二十六  
御覽六百八十四

中宮天極星其一明者太乙常居旁三星三公或曰子屬後

勾四星末大星正妃餘三星後宮之屬也

通考二百七十八

紫宮大帝室太一之精也

史記天官書素隱文選西都賦  
注甘泉賦注魯靈光殿賦注大將

軍譙會  
詩注

太微主法式陳星十二以備非常也

史記天  
官書素隱

天文地理各有所主北斗有七星天子有七政也

御覽五

按馬融註尙書云七政者北斗七星各有所主第一曰主

日法天第二曰主月法地第三曰命火謂熒惑也第四曰

煞土謂填星也第五曰伐水謂辰星也第六曰危木謂歲

星也第七曰罰金謂太白也日月五星各異故名曰七政

也

天理在斗中司三公也如人喉在咽以理舌語

宋均曰斗爲天之口舌主

出政教三公主道宣君命喻於人則宜如人喉在咽以理口舌使言有條理○後漢書李固傳注

軒轅主雷雨之神旁有一星元戈名曰貴人旁側郎位主宿

衛尙書

○御覽五又十三

少微處士位

○史記天官書索隱

王良主天馬也

○史記天官書索隱

大陵

屋主死喪

○後漢書魯恭傳注

東井主水衡

○書鈔百五十

獄漢主逐王

獄漢填星也○御覽八百七十五

五殘主出亡

○御覽八百七十五

旬始主爭兵

○御覽八百七十五

按天官書獄漢星出正北方之野星去地可六丈大而赤數動察之中青此四野星所出出非其方其下有兵衝不利五殘星出正東方之野其星狀類辰星去地可六丈旬



始出於北斗旁狀如雄雞其色青黑象伏鼈

天子精耀心憤務德則景星見

憤猶盛也。御覽八百七十二

赤彗火精如火曜長七尺

御覽八百七十五

霹靂擊於宮殿者妃后爭政

御覽八百七十六

明堂在辰巳者言在木火之際辰木也巳火也木生數三火

成數七故在三里之外七里之內

御覽五百三十三

黃帝請問太乙長生之道太乙曰齋戒六丁道乃可成

選升文

天行注書鈔九十

御覽五百三十

古微書卷八終



古微書卷九

春秋文耀鉤

大率闡星耀而幽曲言之故曰鉤

東宮蒼帝其精爲蒼龍南宮赤帝其精爲朱鳥西宮白帝其

精爲白虎北宮黑帝其精爲元武

○史記天官書索隱

春起青受制

一作蒼帝春受制

其名靈威仰夏起赤受制

赤帝夏受制

其

名赤熒怒秋起白受制

白帝秋受制

其名白招矩冬起黑受制

黑帝

冬受制

其名汁光紀季夏六月土受制

一作黃帝受制王四季

其名含樞

紐○周禮大宗伯疏傳

三十一年穀梁傳疏

鎮星黃帝含樞紐之精其體璇璣中宿之分也

○史記天官書索隱

中宮大帝其精北極星含元出氣流精生物也

○史記天官書索隱

曰中宮大帝其北極星下一明者爲太一之光含元氣以斗

布常是天皇大帝之號也

○周禮大宗伯疏

咸池曰天潢五星五帝

車舍也

宋注曰舍庫也五帝車之府庫初學記廿四御覽百九十一

按大象列星圖北極五星其第一星爲太子第二星最明者爲帝第三星爲庶子餘二屬後宮

文獻通考曰其第四星爲后宮第五星爲天樞卽紐星所爲北辰居其所也又太乙一星在紫宮門右天帝之神也主戰鬪知人吉凶天乙一星相近亦天帝神也主使十六神知風雨水旱兵革饑饉疫疾灾害所生之國其勾陳六星在紫微宮華蓋之下隋志云大帝之正妃張衡云大帝所居之宮也亦將軍之象也勾陳口一星曰天皇亦曰大

帝其神曰耀魄寶主御羣靈東萬機神圖也其星隱而不見見則爲災而此緯文以極星明者稱爲太乙又卽爲天皇大帝與合誠圖所稱大帝皆指北辰何所傳之殊異至於五帝之座亦不係五星張衡云帝坐有五一坐在紫微宮一座在大角一座在心中一座在天市垣一座在太微宮咸云帝座一曰神農所居不見則大人當其咎此文以鎮星爲含樞紐恐別有傳

斗者天之喉舌玉衡屬杓魁爲璇璣

○史記天官書索隱

布度定記分州繫象華岐以北龍門積石至三危之野雍州屬魁星大行以東至碣石王屋砥柱冀州屬樞星三河雷澤東至海岱以北兗州青州屬璣星蒙山以東至江南會稽震

澤徐揚之州屬權星大別以東至雷澤

一作大別以東至富春九江衡山雲夢

九江荊州屬衡星荊山西南至岷山北距鳥鼠梁州屬開陽外方熊耳以至泗水陪尾豫州屬搖光此九州屬北斗星有七州有九但兗青徐揚并屬二州故七星主九州也

○周禮保章氏

疏

按徐整長歷云北斗七星星間相去九千里其二陰星不見者相去八千里也

關令內傳曰北斗一星面百里相去九萬里亦何寥闊之過矣石氏云一主秦二主楚三主梁四主吳五主燕六主趙七主齊母乃近是

天官書曰杓攜龍角衡殷南斗魁枕參首用昏建者杓杓

自華以西南夜半建者衡衡殷中州河濟之間平旦建者魁魁海岱以東北也此其布度分州所自祖與

斗魁戴匡六星曰文昌宮爲六府

○史記天官書索隱初學記廿四書鈔百五十

按天官書一曰上將二曰次將三曰貴相四曰司命五曰司中六曰司祿

亢爲疏廟

宋均云疏外也廟或爲朝○史記天官書索隱

房心天帝之明堂布政之所出也

○周禮大司樂疏

老人星見則主安不見則兵起王者安靜則老人星見

○御覽五

又八百七十二

人主偏黨不決則熒惑久留守於樞

○觀象玩占經星二十八

舍

水土合則成爐冶爐冶成則火興火興則土之子焠金成銷

鑠金鑠則土無子無子輔父則益妖孽故子憂也

星經曰火與木合爲

焠與金合爲鑠水土合爲憂主孽鄉○史記天官書索隱

火守兩河閒兵起

○觀象玩占南方經星

春致其時華實乃榮

○文選西都賦注西征賦注登樓賦注閒居賦注

商絃絕蠶

珥絲

○御覽八百廿五

女媧以下至神農七十二姓

○禮曲禮疏以爲宋注文曜鉤文

按譙周古史以爲伏羲以次有三姓始至女媧女媧之後五十姓至神農神農至炎帝一百三十二姓是不當身相接譙周以神農炎帝爲別人非古義也鄭元六藝論云燧人至伏羲一百八十七代未知孰是

伏羲作易名官

○周禮疏序

高辛受命重黎說天文帝堯卽位義



和立渾儀夏后制德昆吾列神成周改號萇宏分官

○續漢書律歷

楚立唐氏以爲史官有蒼雲如蜺圍軫七蟠中有荷斧之人

嚮軫而蹲

蟠猶周也

楚驚唐史曰君慢命又簡宗廟

命天命也軫於天文楚之

分也向之而居是慢命踞簡宗廟

於是書遺災烟耀於蒼雲精消無文

軫火精雲

水氣圍軫水也書日陽也炎火亦陽也遺之者蒙蟠所也火難勝水三陽併氣日火炎上宜消滅也文則蜺也○御覽二

百三十五又楚有蒼雲如霓唐史曰君慢令簡宗廟以無禮見患

七國俱謀皆懷屠君於是立禮正推禱醮於廟堂之前曰唐

史之策上滅蒼雲謂之神史也不以知道之原哉

○書鈔五十五

又

云太史唐勒以葭灰遺於地乃更拂滅之其蒼雲爲之半滅

又遺灰如前乃盡去之

○事詞類奇天類

一云楚有蒼雲如霓圍軫

七蟠中有荷斧之人向軫而蹲於是楚唐史晝遺灰而雲滅

故曰唐史之策上滅蒼雲

○初學記一御覽八

白虹貫牛山管仲諫曰無近妃宮恐失權齊侯大懼去色黨

更立賢輔使后出望上牛山四面聽之以厭神

宋均曰山君位也虹蜺陰

氣也陰氣貫之君惑於妻黨之象也望謂祭以謝過也○後漢書楊賜傳注

王者往也神所向往人所歸落

○類聚十一御覽七十六歸落作樂歸

庶人爭權赤帝之精

○庶人謂劉項也御覽八十七

賁居子曰按天星之貴亦有遊戲人間如長乳星爲女

子浴於渭河而張寬知之又太乙星不見東方朔令迎

于海中會稽太守果見一人了角坐臥一紅蓮長丈餘

而手持一黃書至于太白竊織女侍兒爲天帝所捕抑

愈怪矣唐開元中北斗爲羣豕入渾天寺僧一行伺而掩之甕中尤可大噱要之神物變化亦復何常窮理未至其眇者未可以輕訶古人也唐史之術直其一端耳春秋運斗樞

此專述璇璣不及衆星也故以斗命篇

伏羲女媧神農是謂三皇也皇者天天不言四時行焉百物生焉三皇垂拱無爲設言而民不違道德元泊有似皇天故稱曰皇皇者中也光也宏也含宏履中開陰布綱上合皇極其施光明指天畫地神化潛通煌煌盛美不可勝量

○風俗通皇霸

篇初學記九  
御覽七十六

按鄭元六藝論以伏羲女媧神農爲三皇引運斗樞之說

也宋均引甄耀度數燧人伏羲神農爲三皇禮含文嘉尙書大傳譙周古史考並同惟白虎通取伏羲神農祝融爲三皇而孔安國則以伏羲神農黃帝爲三皇皆與鄭異

黃帝得龍圖中有璽章文曰天皇符璽

○路史夏后紀注皇作黃

又黃帝

坐元扈與大司馬容光觀鳳皇銜圖置黃帝前

○類聚四十七御覽二百

九

舜以太尉之號卽位天子五年二月東巡狩至於中州與三

公諸侯臨觀于河黃龍五采負圖出置舜前

○龍去也

入水而

前去黃玉爲柙長三尺廣八寸有戶白玉爲檢黃金爲繩紫

芝爲泥封兩端章曰天皇帝符璽鳥文舜與大司馬禹臨侯

博望等三十人集發圖元色綈長三十二尺中有七十二帝

地形之制天文位度之差藏之大麓

○初學記六御覽六十一又八十一路史餘論

七

黃龍從雒水出詣虞舜鱗甲成字舜令寫之寫竟去此

文又見河圖挺佐輔篇

赤龍負圖以出河見堯與太尉舜等百二十

人集發藏之大麓

○御覽二百七

賁居子曰地形天文固可圖而載矣七十二帝篇冊不  
太侈乎天上鳥文伊誰握管若不可辨則必非書若其  
可辨豈仍同人間篆迹也至以太尉臨侯爲疑則譌書  
者不陋至此安知秦漢官號不製自上古乎

北斗七星第一天樞第二璇第三璣第四權第五玉衡第六  
開陽第七瑤光第一至第四爲魁第五至第七爲杓合而爲  
斗居陰布陽故稱北斗

○史記天官書索隱禮曲禮上疏類聚一御覽五

按石氏星經篇一曰正星主陽德天子之象也二曰法星主陰刑女主之位也三曰令星主中禍四曰伐星主天理伐無道五曰殺星主中央助四旁殺有罪六曰危星主天倉五穀七曰部星主兵又一主天二主地三主火四主水五主土六主木七主金又樞爲天璇爲地璣爲人權爲時玉衡爲音開陽爲律搖光爲星兼此數義故謂之七政

太微宮有五帝座星

○周禮大宗伯疏

五帝所行同道異位皆循斗

樞機衡之分遵七政之紀九星之法

○初學記一御覽五

故天樞得則

景星見甘露零鳳凰翔朱草生

○御覽五又八百七十二又八百七十三又九百十五

璇星得則嘉禾液

○御覽八

璣星得則狐九尾

○類聚九十九衡星

得則百獸率舞麒麟至靈龜躍萬人壽

○初學記一類聚九十九權星得

則日月光鳥三足禮義循物類合

○類聚九十九瑤光得則

陵醴出元芝生

○類聚九十八御覽八百七十三並無醴字及生字

江吐大貝

海出明珠

○御覽八百七十三

樞星散爲麀爲虎爲象又爲雲母

○初學記二十九御覽八百八又八百九十一又九

七百

璇星散爲橘爲薑

○御覽九百六十六又九百七十七

璣星散爲雉爲鷦爲鶉爲菝葜

○御覽九百二十七又九百二十一又九百二十四又九百

九十

玉衡星散爲雞爲鴟爲兔爲鼠

又散爲李爲桃爲椒爲荊爲

榆又爲菖蒲

○御覽九百七又九百十一又九百十八又九百廿三又九百五十六又九百五十八又九百

五十九又九百六十七又九百六十八又九百九十九

權星散爲麋無

御覽九百八十三

瑤光散爲象爲麋爲鳥

當作鳥爲雀爲燕爲鵲

此二字衍

爲鷹爲

龜又爲人參爲鹿

御覽八百九十九又九百六十六又九百二十一又九百廿二又九百廿六又九百三十一

又九百九十一

行失樞星失德逆時則薑有異辛而不臭

御覽九百七十七

遠雅頌著倡優則玉衡不明菖蒲冠環雄雞五足李生瓜

初

學記三十類聚八十一御覽九百六十八又九百七十八又九百九十九

廢江淮山瀆之祠斬伐無度則瑤光不明人參不生服翼九

足

服翼鼠也彘生鹿

初學記廿九御覽九百四十六又九百九十一又瑤光攜則服翼

兩頭並翔

類聚九百四十六御覽九百四十六

又行失瑤光則孖生角孖生角

則有赤風

書鈔百二十三

又行失瑤光則兔出月

類聚九百七十五御覽九百七十五



按五星之降而爲人爲物爲石爲玉此多有也至於瓜果禽鳥皆繫七星而一失舉動卽應於璣衡惟此緯爲悉

靈臺祕苑曰王者失道下將畔去則星畔天而隕以見其象將有兵凶則星墜爲鳥獸天下將亡則星墜爲飛蟲將大兵則星墜爲金鐵將水則星墜爲土主亡有兵則星墜爲草木兵起主亡則星墜爲沙有大喪則星墜爲龍又爲人星墜爲人而言者善惡如其言

王政和平則老人星臨國萬民以歌

御覽八百七十二

日行失則雖當煖而寒日血濁霧天下小窵

御覽三百四十八

政紀乖則蟾蜍月精四頭咸翔

咸翔爲妖也。御覽九百四十九

后族擅權月生足芒主勢奪於后族羣妃之黨橫僭則月盈

並出小月承大月羣姦在宮主若贅旒大月承小月近臣起

讒人橫陪臣執命三公望風

○御覽四

又勢集于后族羣妃之黨

僭黃雲四合女訛驚邦

又

赤人刺房

○並御覽八  
百七十七

黃帝行天樞則枉矢出射所謀

○御覽八  
百七十五

房爲龍角月蝕則見於大辰

○書鈔  
百五十

星孛賊起守大辰於

五堂亂兵填門三王爭周以分

○昭十七年  
公羊傳疏

牽牛神名略

○石氏云名天關  
荆楚歲時記

地動則見於天象四角主災月蝕則見

○書鈔  
百五十

邑之淪陰

吞陽下相屠焉

○占經  
地占

土躍沙城后黨盛也

○抄本書鈔  
百五十九

山者地基也

○文選鍾山詩注挽歌  
詩注張景陽雜詩注

德義少殘百家則鷄無頭

○御覽九  
百廿一

四方煩擾小民失恩

虎銜魚

○御覽九百三十五

飛翔羽翮爲陽陽氣仁故烏反哺

○初學記三十御覽九百二十

椒桂合剛陽

○椒桂陽星之精所生也合猶連體而生類聚八十九御覽九百五十七

椒桂連

名士起

○文選陶徵士誄注

粟五變以陽化生而爲苗秀爲禾三變而發謂之粟四變入

白米出甲五變而蒸飯可食

○初學記廿六御覽八百五十

四時王者休王所勝者死相所勝者囚假令春之三月木王

水生木水休木勝土土死木王火相王所生者相相所勝者

囚火勝金春三月金囚

○周禮占夢疏引春秋緯

黃金千歲生黃龍青金千歲生青龍赤金千歲生赤龍白金

千歲生白龍元金千歲生元龍

○此條又見河圖挺佐輔篇

按淮南子曰正土之氣也御乎埃天埃天五百歲生缺缺  
五百歲生黃埃黃埃五百歲生黃頊黃頊五百歲生黃金  
黃金千歲生黃龍黃龍入藏生黃泉黃泉之埃上爲黃雲  
陰陽相薄爲雷激揚爲電上者就下流水就通而合於黃  
海偏土之氣御乎清天清天八百歲生青曾青曾八百歲  
生青頊青頊八百歲生青金青金八百歲生青龍青龍入  
藏生青泉青泉之埃上爲青雲陰陽相薄爲雷激揚爲電  
上者就下流水就通而合于青海壯土之氣御于赤天赤  
天七百歲生赤丹赤丹七百歲生赤頊赤頊七百歲生赤  
金赤金千歲生赤龍赤龍入藏生赤泉赤泉之埃上爲赤  
雲陰陽相薄爲雷激揚爲電上者就下流水就通而合于

赤海弱土之氣御于白天白天九百歲生白礪白礪九百  
歲生白頊白頊九百歲生白金白金千歲生白龍白龍入  
藏生白泉白泉之埃上爲白雲陰陽相薄爲雷激揚爲電  
上者就下流水就通而合于白海化土○案淮南子作北土之氣御  
于元天天天六百歲生元砥元砥六百歲生元頊元頊六  
百歲生元金元金千歲生元龍元龍入藏生元泉元泉之  
埃上爲元雲陰陽相薄爲雷激揚爲電上者就下流水就  
通而合于元海

常占有經世史所明

○續漢書律歷志

夏不田

○禮王制疏

按禮記疏鄭元釋之云四時皆田夏殷之禮孔子雖有聖

德不敢顯然改先王之法以教授於世若其所欲改具陰書於緯藏之以傳後王穀梁四時田者近孔子故也

月八日刺是謂害地有分民九日刺其饑民以食弱以兵行十日刺女子執政十一日刺其下有陰死者十二日刺其下昏亂十三日刺是謂始強得地十四日刺是謂不和其下女傷十五日刺是謂盛強其下多兵十六日刺是謂內弱臣叛其主十七日刺是謂滅法有兵十八日刺是謂溫犯十九日刺是謂陽衰陰治女執事二十日刺其地有土功二十一日刺是謂千里外有聚兵二十二日刺是謂始衰貴人多死二十三曰刺是謂陰盛女子有主二十四日刺中有大謀二十五日刺是謂陰隱國有殃二十六日刺是謂多憂二十七日

刺是謂大饑二十八日刺是謂自伐有內亂

觀象  
玩占月

星孛東方將軍謀王星孛西方羌胡叛中國星孛南方天下

兵起星孛北方夷狄內侵

觀象玩  
占星雜變

彗星見委曲象旗王者征伐四方長竟天人主失天下

古微書卷九終





